

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY  
NOV 16 1941

T9299/8125(45)

學海君道部創業類

帝王開基門十二

大業篇七

高祖興唐章

帝王開基門十三

大業篇八

太宗平天下章

帝王開基門十四

大業篇九

太宗平內難章

學海君道部卷之一百三十六

創業類

帝王開基二十

大業篇六

高祖興唐章

高祖神堯皇帝姓李氏諱淵龍西人初嗣父爵為唐國公

唐書紀曰高祖初襲封唐公隋文帝獨孤皇后高祖之從母也以

故文帝與高祖相親愛文帝受禪以高祖為千牛備身譙隴二州

刺史煬帝大業中歷岐州刺史滎陽樓煩二郡太守召為殿內少

監衛尉少卿

隋大業九年癸酉秋七月以唐公李淵為弘化畱守

哈佛大學漢和  
圖書館珍藏印

唐書通鑑曰煬帝征遼東遣唐公李淵督糧運於懷遠鎮楊玄感將反其兄弟從征遼者皆逃歸淵先覺以聞煬帝遽班師以弘化畱守元弘嗣斛斯政之親也遣淵馳往執之因代爲畱守關右十三郡兵皆受徵發淵御衆寬簡人多附之是時隋政荒天下大亂煬帝多以猜忌殺戮大臣以淵相表奇異又名應圖讖未幾徵詣行在所淵遇疾不時謁有甥王氏在後宮煬帝問之曰汝舅來何遲王氏以疾對煬帝曰可得死否淵聞之懼因縱酒納賂以自晦

大業十一年<sub>乙亥</sub>夏四月以李淵爲山西河東慰撫大使

以李淵承制黜陟選補郡縣文武官仍發河東兵討補羣盜淵行至龍門擊賊帥毋端兒破之

十二月詔樊子蓋擊絳賊敬盤陶等賊降者皆阬之百姓怨憤益相聚爲盜詔以李淵代之有降者淵引置左右由是賊衆多終前後數萬人餘黨入他郡

大業十二年<sub>丙子</sub>冬十二月以李淵爲太原畱守

十二月詔以李淵爲太原畱守以虎賁郎將王威虎牙郎將高君雅爲之副擊高陽歷山飛賊甄翟兒于西河破之

卮言曰唐室之興豈非天乎當其始封於唐惟列爵而未分土也及爲太原畱守乃適得其封壤蓋若天所命焉夫太原故唐國而勁兵處也自趙鞅據晉陽以雄列國其後要害比於長安秦之并天下也必先定太原上黨漢以韓王信材武徙居馬邑司馬氏之初亦以晉爲封號而劉淵跣拔皆興於代石晉劉漢並起太原以取中朝太原誠重地也唐祖得之以成帝業豈偶

然哉漢高帝始封漢中蕭何曰語云天漢其稱甚美然則項羽  
之以漢中封漢祖煬帝之以太原屬唐公也天意已默定矣

### 詔李淵擊突厥

突厥數寇北邊詔李淵與馬邑太守王仁恭擊之隋兵少不敵淵  
選精騎二千爲游軍居處飲食隨水草如突厥而射獵馳騁示以  
間暇別選善射者伏爲奇兵虜見淵疑不敢戰淵乘而擊之突厥  
敗走

十三年

丁丑夏五月李淵起兵太原殺副留守王威高君雅

通鑑曰初唐公李淵娶於神武公竇氏生四男建成世民玄霸元  
吉一女適柴紹世民聰明勇決識量過人見隋室方亂陰有安天  
下之志傾身下士散財結客感得其歡心世民娶右驍衛將軍長

孫晟之女右勳衛長孫順德晟族弟也與右勳侍劉弘基皆避遼  
東之役亡命在晉陽依淵與世民善左親衛竇琮亦亡命在太原  
素與世民有隙每以自疑世民加意待之出入卧内琮意乃安晉  
陽宮監裴寂晉陽令劉文靜相與同宿見城上烽火寂歎曰貧賤  
如此復逢亂離將何以自存文靜笑曰時事可知吾二人相得何  
憂貧賤文靜見世民而異之深自結納謂寂曰此非常人豁達類  
漢高神武同魏祖年雖少命世才也寂初未然之文靜坐與李密  
連昏繫太原獄世民就省之文靜曰天下大亂非高光之才不能  
定也世民曰安知其無但人不識耳我來相省非見女子之情欲  
與君議大事也計將安出文靜曰今主上南巡江淮李密圍逼東  
都羣盜殆以萬數當此之際有貞主驅駕而用之取天下如反掌

耳太原百姓皆避盜入城文靜爲令數年知其豪傑一旦收集可得十萬人尊公所將之兵復且數萬一言出口誰敢不從以此乘虛入關號令天下不過半年帝業成矣世民笑曰君言正合我意乃陰部署賓客淵不之知也世民恐淵不從猶豫久之不敢言淵與晉陽官監裴寂有舊每相與宴語或連日夜文靜欲因寂關說乃引寂與世民交世民出私錢數百萬使龍山令高斌廉與寂博稍以輸之寂大喜由是日從世民遊情欵益狎世民乃以其謀告之寂許諾會突厥寇馬邑淵遣高君雅將兵與馬邑太守王仁恭拒之戰不利淵恐并獲罪甚憂之世民乘間屏人說淵曰今主上無道百姓困窮晉陽城外皆爲戰場大人若守小節下有寇盜上有嚴刑危亡無日不若順民心興義兵轉禍爲福此天授之時也

淵大驚曰汝安得爲此言吾今執汝以告縣官因取紙筆欲爲表世民徐曰世民觀天時人事如此故敢發言必欲執告不敢辭也淵曰吾豈忍告汝汝慎勿出口明日世民復說淵曰今盜賊日繁遍於天下大人受詔討賊賊可盡乎要之終不免罪且世人皆傳李氏當應圖讖故李金才無罪一朝族滅大人設能盡賊則功高不賞身益危矣唯昨日之言可以救禍此萬全之策也願大人勿疑淵乃歎曰吾一夕思汝言亦大有理今日破家亡軀亦由汝化家爲國亦由汝矣先是裴寂私以晉陽官人侍淵淵從寂飲酒酣寂從容言曰二郎陰養士馬欲舉大事正爲寂以官人侍公恐事覺并誅爲此急計耳衆情已協公意如何淵曰吾見誠有此謀事已如此當復奈何正須從之耳煬帝以淵與王仁恭不能禦寇遣

使者執詣江都淵大懼世民與寂等復說淵曰今主昏國亂盡忠無益偏裨失律而罪及明公事已迫矣宜早定計且晉陽士馬精彊宮監蓄積巨萬以茲舉事何患無成代王幼冲關中豪傑並起未知所附公若鼓行而西撫而有之如探囊中之物耳柰何受單使之囚坐取夷滅乎淵然之密部勒將發已而煬帝復馳使者赦止淵及仁恭使復舊任淵謀亦緩淵之為河東討捕使也請夏侯端為副端善占候及相人謂淵曰今玉牀搖動帝座不安參墟得歲必有真人起於其分左傳參為晉星故以晉陽為參墟得歲謂歲星居參也非公而誰乎主上猜忍尤忌諸李金才既死公不思變通必為之次矣淵心然之及留守晉陽鷹揚府司馬許世緒說淵曰公姓在圖錄名應歌謠握五郡之兵當四戰之地舉事則帝業可成端居則亡不旋踵

唯公圖之行軍司鎧武士護左勳衛唐憲憲弟儉皆勸淵舉兵儉說淵曰明公北詔戎狄南收豪傑以取天下此湯武之舉也淵曰湯武非所敢擬在私則圖存在公則拯亂卿姑自重吾將思之時建成元吉尚在河東故遷延未發劉文靜謂裴寂曰先發制人後發制於人何不早勸唐公舉兵而推遷不已且公為官監而以官人侍客公死可爾何誤唐公也寂甚懼屢趣淵起兵淵乃使文靜詐為敕書發太原西河鴈門馬邑民年二十已上五十已下悉為兵期歲暮集涿郡擊高麗由是人情怏怏思亂者益眾及劉武周據汾陽宮世民言于淵曰大人為留守而盜賊竊據離宮不早建大計禍今至矣淵乃集將佐謂之曰武周據汾陽宮吾輩不能制罪當族滅若之何王威等皆懼再拜請淵曰朝廷用兵動

止皆稟節度今賊在數百里內江都在三千里外加以道路險要復有它賊據之以嬰城膠柱之兵當拒猾豕突之勢必不全矣進退維各何爲而可威等皆曰公地兼親賢同國休戚若俟奏報豈及事機要在乎賊專之可也淵陽若不得已而從之者曰然則先當集兵乃命世民與劉文靜長孫順德劉弘基等各募兵遠近赴集旬日間近萬人仍密遣使召建成元言於河東柴紹於長安廷威高君雅見兵大集疑淵有異志謂武士護曰順德弘基皆背征二侍所犯當死安得將兵欲收按之士護曰二人皆唐公客若爾必大致紛紜威等乃止留守司兵田德言欲勸威等按募人之狀士護曰討捕之兵悉隸唐公威君雅俱可坐耳彼何能爲德平亦止晉陽鄉長劉世龍密告淵云威君雅以因晉祠祈雨爲不利五月癸亥夜淵使世民伏兵於晉陽官城之外甲子日淵與威君雅共坐視事使劉文靜引開陽左司馬胙城劉政會入立庭中稱有密狀淵目威等取狀視之政會不與曰所告乃副留守事唯唐公得視之淵陽驚曰豈有是邪視其狀乃云威君雅潛引突厥入寇君雅攘袂大詬曰此乃反者欲殺我耳世民已布兵塞衢路文靜因與劉弘基長孫順德等共執威君雅繫獄丙寅突厥數萬衆寇晉陽輕騎入外郭北門出其東門淵命裴寂等勒兵爲備而悉開諸城門突厥不能測莫敢進衆以爲威君雅實召之也淵於是斬威君雅以徇淵部將王康達將千餘人出戮皆死城中惴懼淵夜遣軍潛出城旦則張旗鳴鼓自它道來如拔外者突厥終疑之

留城



尹氏曰唐公以義起兵大非羣盜之比而綱目一槩書之何耶  
公儻能正名伏羲若湯之伐桀武王之伐紂沛公之誅無道秦  
則綱目其亦必有以處此矣惜乎兵以義名乃止於尊隋而不  
能為討罪之舉君子雖欲異之不可得已况又淫污宮掖設詐  
罔衆殺人以利已者乎

六月李淵遣使如突厥

建成元吉棄其弟智雲於河東而去吏執送長安殺之六月建成  
元吉與柴紹偕至晉陽劉文靜勸淵與突厥相結資其士馬以益  
兵勢淵從之自為手啓卑辭厚禮遣始畢可汗云欲大舉義兵遠  
迎主上復與突厥和親如開皇之時若能與我俱南願勿侵暴百  
姓若但和親坐受寶貨亦唯可汗所擇始畢得啓謂其大臣曰隋

主為人我所知也若迎以來必害唐公而擊我無疑矣苟唐公自  
為天子我當不避盛暑以兵馬助之卽命以此意為復書使者七  
日而返將佐皆喜請從突厥之言淵不可裴寂劉文靜等皆曰今  
義兵雖集而戎馬殊乏胡兵非所須而馬不可失若復稽回恐其  
有悔淵曰諸君宜更思其次寂等乃請尊天子為太上皇立代王  
為帝以安隋室移檄郡縣改易旗幟雜用絳白以示突厥淵曰此  
可謂掩耳盜鍾然逼於時事不得不爾乃許之遣使以此議告突  
厥西河郡不從

性理或問范祖禹唐鑑譏太宗曰陷父之罪脅以起兵古人行  
一不義而得天下弗為也太宗終守臣節可也愚歷觀唐史隋  
煬帝既遣江都之使唐高祖不宜坐處夷滅况大業之末生民

帝王開基 卷十一  
塗炭太宗苟不爲此必無以濟蒼生之困范氏正大之說果可  
用否使聖賢守此當守臣節乎將權以濟事乎潛室陳氏曰孤  
隋之暴何止桀紂若欲行湯武之事但當正名弔伐不當自陷  
於盜賊之地而脅以起兵以斯舉事是以亂易亂也大桀小桀  
也惜乎太宗有濟世之志傷於欲速迫切反以堂堂禮義之師  
自陷於亂臣賊子之倫世有理明義直之事只爲學術不正舉  
動不明便壞了事

卮言曰陳氏旣以隋爲桀紂太宗可爲湯武矣而又以爲陷  
於亂臣賊子之倫是無安頓太宗處也又引范氏之論曰太  
宗終守臣節可也是又欲太宗爲文王也文王雖不伐紂而  
怙冒西土撫有方夏德業盛矣太宗以經綸之才生濁亂之

世不建大業不過一唐公子耳坐處誅滅何益於時豈天所  
以生豪傑之意乎且當是時羣雄並起稱帝稱王者已十數  
矣觀高祖所爲實無意於大事太宗又不能背父而與一旅  
也故爲謀以決之官人私侍則裴寂之計左也使有如張子  
房者爲之謀則善矣雖然成大功者不恤小節記大行者不  
錄小過晉陽宮人何足爲重輕而以爲莫大罪也其罪不在  
太宗而以陷父爲賊子也持論之過至此哉太宗之自許不  
過高光而爲唐史者曰征伐之盛比於湯武此其所以致後  
人之譏歟

范氏曰匹夫欲自立於鄉黨不可不自重也况圖王業舉大事  
而可以不正啓之乎太宗陷父於罪而劫之以起兵高祖昵裴

卷十一  
寂之邪謀受其宮女而不辭又稱臣於突厥倚以爲助是以唐  
世人主無正家之法夷狄多猾夏之亂蓋高祖以此始之也古  
之王者行一不義殺一不辜而得天下不爲也惜乎太宗有濟  
世之志撥亂之才而不知義也

謝九成曰唐高祖起兵而借兵馬于突厥儒者非之于考晉陽  
逼近胡境每被寇邊倘不與之連和則劉武周必引之以爲邊  
患又胡馬行牧不費芻粟聊欲藉之以爲聲勢結之以杜後虞  
耳觀其諭劉文靜曰胡騎入中國生民之大蠹也數百人之外  
無所用之則其設施議論豈若庸代二帝及石晉之君以借兵  
戎狄而騷危中國者之所爲哉

卮言曰丘瓊山以爲中國稱臣於夷狄始此然詳考二唐書  
及通鑑綱目所載惟云甲辭厚禮約和親許寶貨而已突厥  
欲唐公自爲天子亦未敢臣唐公也如以甲辭請和遂爲稱  
臣則漢晉之世已先爲之矣

李淵遣世子建成及世民擊西河郡拔之

六月甲申淵使建成世民將兵擊西河命太原令溫大有與之偕  
行曰吾兒年少以卿參謀軍事事之成敗當以此行卜之時軍士  
新集咸未閱習建成世民與之同甘苦遇敵則以身先之近道菜  
果非買不食軍士有竊之者輒求其主償之亦不語竊者軍士及  
民皆感悅至西河城下民有欲入城者皆聽其入郡丞高德儒閉  
城拒守己丑攻拔之執德儒至軍門世民數之曰汝指野鳥爲鸞  
以欺人主取高官吾興義兵正爲誅佞人耳遂斬之自餘不戮一

人秋毫無犯各慰撫使復業遠近聞之大悅引兵還晉陽往返凡九月淵喜曰以此行兵雖橫行天下可也遂定入關之計

庖言曰史稱漢高帝寬仁然其始伐楚也不免屠潁川以示兵威唐太宗初起兵拔西河而不戮一人可謂仁義之師矣

李淵自稱大將軍開府置官屬

淵開倉以賑貧民應募者日益多淵命爲三軍分左右通謂之義士裴寂等上淵號爲大將軍癸巳建大將軍府以寂爲長史劉文靜爲司馬唐儉及前長安尉溫大雅爲記室大雅仍與弟大有共掌機密武士彠爲鎧曹殷開山爲椽劉政會爲屬長孫順德劉弘基竇琮等爲統軍自餘文武隨才授任又以世子建成爲隴西公左領軍大都督左三統軍隸焉世民爲敦煌公右領軍大都督右三統軍隸焉各置官屬以紫紹爲右領軍府長史諮議突厥遣使至太原李淵遣劉文靜報之

突厥遣其柱國康鞘利等送馬千匹詣李淵爲互市許發兵送入關多少隨所欲丁酉淵引見康鞘利等受可汗書禮容盡恭贈遣康鞘利等甚厚擇其馬之善者止市其半義士請以私錢市其餘淵曰虜饒馬而貪利其來將不已恐汝不能市也吾所以少取者示貧且不以爲急故也當爲汝費之不足爲汝費乙巳靈壽賊帥郝士陵帥衆數千降于淵淵以爲鎮東將軍燕郡公仍置鎮東府補僚屬以招撫山東郡縣巳巳康鞘利北還淵命劉文靜使於突厥以請兵私謂文靜曰胡騎入中國生民之大蠹也吾所以欲得之者恐劉武周引之共爲邊患又胡馬行牧不費芻粟聊欲藉之

以爲聲勢耳數百人之外無所用之

秋七月李淵引兵至霍邑代王侑遣郎將宋老生將軍屈突通將兵拒之

七月壬子李淵以元吉爲太原太守留守晉陽宮後事並委之癸丑淵帥甲士三萬發晉陽杖白旗立軍門誓衆并移檄郡縣諭以尊立代王之意西突厥阿史那大奈亦帥其衆以從甲寅遣通議大夫張綸將兵徇稽胡丙辰淵至西河慰勞吏民賑贍窮乏民年七十已上皆除散官其餘豪傑隨才授任口詢功能手注官秩一日除千餘人淵進軍雀鼠谷壬戌至賈胡堡去霍邑五十餘里代王侑遣郎將宋老生帥精兵二萬屯霍邑大將軍屈突通將驍果數萬屯河東以拒之會積雨淵不得進遣府佐沈叔安等將羸兵

還太原更運一月糧乙丑張綸克離石殺太守楊子崇劉文靜至突厥見始畢可汗請兵且與之約曰若入長安民衆土地入唐公金玉繒帛歸突厥始畢大喜丙寅遣其大臣級失特勒先至軍中告以兵已上道淵以書招李密密自恃兵強欲爲盟主復書曰所望左提右挈戮力同心執子嬰於咸陽殪商辛於牧野淵得書笑曰密妄自矜大非折簡可致吾方有事關中若遽絕之乃是更生一敵不如早辭推獎以驕其志使爲我塞成臯之道綴東都之兵我得專意西征俟關中平定收之未晚也乃復書推獎密大喜自是信使往來不絕

胡氏曰武王伐商數紂之罪則多矣煬皆有之而弑父殺兄則紂之所未有其當討無疑矣李淵聲其大逆不道之罪而舉兵

卷十一  
討之則雖德非成湯亦無愧於自毫之載世民不必用宮人私侍以劫父也不必詐爲敕書發民以鼓怨也不必稱臣突厥也不必尊江都而立代王也不必推獎李密以驕其志也堅守晉陽收召豪傑厚集其衆分擊二京義聲旣震羣盜自下乃遣良將總銳師南指楊士則不逾旬時罪人斯得天下歸唐其孰能禦之惜乎世民有安天下之志才足以撥亂而無湯武及身之學劉文靜智謀之士耳裴寂又出其下故雖乘時舉事不旋踵成功而用智術違義理者多矣

八月李淵與宋老生戰斬之遂取霍邑

時雨久不止淵軍中糧乏劉文靜未返或傳突厥與劉武周乘虛襲晉陽淵召將佐謀北還裴寂等皆曰宋老生屈突通連兵據險未易猝下李密雖云連和姦謀難測突厥貪而無信唯利是視武周事胡者也太原一方都會且義兵家屬在焉不如還救根本更圖後舉世民曰今禾菽被野何憂乏糧老生輕躁一戰可擒李密顧戀倉粟未遑遠略武周與突厥外雖相附內實相猜武周雖遠利太原豈可近忘馬邑本興大義奮不顧身以救蒼生當先入咸陽號令天下今遇小敵遽已班師恐從義之徒一朝解體還守太原一城之地爲賊耳何以自全建成亦以爲然淵不聽促令引發世民將復入諫會日暮淵已寢世民不得入號哭於外聲聞帳中淵召問之世民曰今兵以義動進戰則克退還則散衆散於前敵乘於後死亡無日何不悲淵乃悟曰軍已發奈何世民曰右軍嚴而未發左軍雖去計亦未遠請自追之淵笑曰吾之成敗皆在爾

知復何言唯爾所為世民乃與建成夜追左軍復還丙子太原運糧亦至是時薛舉作亂於金城將侵河右武威人共推李軌為涼王以拒舉薛舉自稱秦帝徙都天水煬帝詔薛世雄將兵討李密為竇建德所敗死建德遂圍河間八月己卯雨霽庚辰淵命軍中曝鎧仗行裝辛巳且出東南由山足細道趨霍邑淵恐老生不出建成世民曰老生勇而無謀以轉騎挑之理無不出脫其固守則誣以貳於我彼恐為左右所奏安敢不出淵曰汝測之善老生不能逆戰賈胡謂唐屯賈胡堡老生不能逆戰吾知其無能為也淵與數百騎先至霍邑城東數里以待步兵使建成世民將數十騎至城下舉鞭指麾若將圍城之狀且詬之老生怒引兵三萬自東門南門分道而出淵使殷開山趨召後軍至淵欲使軍士先食而戰世民曰時不

可失淵乃與建成陳於城東世民陳於城南老生兵薄東陣建成墜馬老生乘之東軍小却世民與軍頭段志玄自南原引兵馳下峻坂衝老生陳出其背世民手殺數十人兩刀皆缺流血滿袖灑之復戰唐兵復振因傳呼曰已獲老生矣老生兵大敗唐淵兵先趨其門門閉老生下馬投塹引繩欲上劉弘基就斬之僵尸數里日已暮淵即命登城時無攻具將士肉薄而登遂克之壬午淵引見霍邑吏民勞賞如西河選其丁壯使從軍關中軍士欲歸者並授五品散官遣歸或諫以官太濫淵曰隋氏吝惜勳賞此所以失人心也奈何効之且收衆以官不勝於用兵乎

李淵克臨汾絳郡劉文靜以突厥兵至遂下韓城

丙戌李淵入臨汾郡慰撫如霍邑庚寅宿鼓山絳郡通守陳叔達

拒守辛卯進攻克之癸巳淵至龍門劉文靜康鞘利以突厥兵五百人馬二千匹來至淵喜其來援謂文靜曰吾西行及河突厥始至兵少馬多皆君將命之功也汾陽薛大鼎說淵請勿攻河東自龍門直濟河據永豐倉傳檄遠近關中可坐取也淵將從之諸將請先攻河東乃以大鼎爲大將軍府察非椽河東縣戶曹任瓌說淵曰關中豪傑皆企踵以待義兵瓌在馮翊積年知其豪傑請往諭之必從風而靡義師自梁山濟河指韓城逼郃陽蕭造文吏必望塵請服孫華之徒皆當遠迎然後鼓行而進直據永豐雖未得長安關中固已定矣淵悅以瓌爲銀青光祿大夫時關內羣盜孫華最彊丙申淵至汾陰以書招之巳亥淵進軍壺口河濱之民獻舟者日以百數仍置水軍壬寅孫華自郃陽輕騎渡河見淵淵握手與坐慰獎之以華爲左光祿大夫武鄉縣公領馮翊太守其徒有功者委華以次授官賞賜甚厚使之先濟繼遣左右統軍王長諧劉弘基及左領軍長史陳演壽金紫光祿大夫史太奈將步騎六千自梁山濟營於河西以待大軍以任瓌爲招慰大使瓌說韓城下之淵謂長諧等曰屈突通精兵不少相去五十餘里不敢來戰足明其衆不爲之用然逃畏罪不出若自濟河擊卿等則我進攻河東必不能守若全軍守城則卿等絕其河梁前扼其喉後拊其背彼不走必爲擒矣是時李密遣其將徐世勣襲黎陽倉諸郡相繼降密竇建德朱粲之徒亦遣使附密九月乙卯張綸狗龍泉文成等郡皆下之獲文成太守鄭元璠屈突通遣虎牙郎將桑顯和將驍果數千人夜襲王長諧等營長諧等戰不利孫華史太



奈以遊騎自後擊顯和大破之顯和脫走入城仍自絕河梁

九月馮翊太守蕭造降於李淵淵留兵圍河東自引軍西

九月丙辰馮翊太守蕭造降於李淵戊午淵帥諸軍圍河東屈突通嬰城自守將佐復推淵領太尉增置官屬淵從之時河東未下三輔豪傑至者以千數淵欲引兵西趣長安猶豫未決裴寂曰屈突通擁大衆馮堅城吾捨之而去若進攻長安不克退爲河東所踵腹背受敵此危道也不若先克河東然後西上長安恃通爲援通敗長安必破矣世民曰不然兵貴神速吾席累勝之威撫歸附之衆鼓行而西長安之人望風震駭智不及謀勇不及斷取之若振槁葉耳若淹留自弊於堅城之下彼得成謀修備以待我坐費日月衆心離沮則大事去矣且關中峯起之將未有所屬不可不蚤招懷也屈突通自守虜耳不足爲慮淵兩從之留諸將圍河東自引軍而西朝邑舍法曹武功斬孝謨以蒲津中渾二城降華陰令李孝常以永豐倉降仍應接河西諸軍京兆諸縣亦多遣使請降是時隋將王世充擊李密於洛口與密夾洛水相守

李淵濟河遣建成守潼關世民徇河北

庚申李淵帥諸軍濟河甲子至朝邑舍於長春宮關中士民歸之者如市丙寅淵遣世子建成司馬劉文靜帥王長諧等諸軍數萬人屯永豐倉守潼關以備東方兵慰撫使竇軌等受其節度敦煌公世民帥劉弘基等諸軍數萬人徇渭北慰撫使殷開山等受其節度冠氏長于志寧安養尉顏師古及世民婦兄長孫無忌謁見淵於長春宮淵皆禮而用之屈突通聞淵西入署堯君素領河東

通守使守蒲坂自引兵數萬趣長安爲劉文靜所遏將軍劉綱成  
潼關屯都尉南城通欲往依之王長諧先引兵襲斬綱據城以拒  
通通退保北城淵遣其將呂紹宗等攻河東不能克

柴紹妻李氏及李神通段綸各起兵以應李淵關中羣盜悉降於淵  
初柴紹之自長安赴太原也其妻李氏

唐公之女

歸鄂縣別墅

散家貲聚徒衆淵從弟神通在長安亡入鄂縣山中與長安大俠  
史萬寶等起兵以應淵西域商胡何潘仁入司竹園爲盜有衆數  
萬劫前尚書右丞李綱爲長史李氏使其奴馬三寶說潘仁與之  
就神通合勢攻鄂縣下之神通衆踰一萬自稱關中通行軍總管  
以前樂城長令狐德棻爲記室李氏又使馬三寶說羣盜李仲文  
向善志丘師利等皆帥衆從之西京留守屢遣兵討潘仁等皆爲

所敗李氏狗齧屋武功始平皆下之衆至七萬左親衛段綸娶淵  
女亦聚徒於藍田得萬餘人及淵濟河神通李氏綸各遣使迎淵  
淵使柴紹將數百騎並南山迎李氏何潘仁李仲文向善志及關  
中羣盜皆請降于淵淵一一以書慰勞授官使各居其所受敦煌  
公世民節度

冬十月李淵合諸軍圍長安

京兆內史衛文昇年老聞淵軍至長安憂懼成疾獨將軍陰世師  
郡丞骨儀奉代王侑乘城拒守已巳淵如蒲津庚午自臨晉濟渭  
至永豐倉勞軍開倉賑饑民辛未遷長春宮壬申進屯馮翊世民  
所至吏民及羣盜歸之如流世民收其豪俊以備僚屬營于涇陽  
勝兵九萬李氏將精兵萬餘會世民於渭北與柴紹各置幕府號

娘子軍淵命劉弘基殷開山分兵西略扶風有衆六萬南度渭水屯長安故城城中出戰弘基逆擊破之世民引兵趣司竹李仲文何潘仁向善志皆帥衆從之頓于阿城勝兵十三萬軍令嚴整秋毫不犯乙亥世民自整屋遣使白淵請期日赴長安淵曰屈突東行不能復西不足虞矣乃命建成選倉上精兵自新豐趣長樂宮世民帥新附諸軍北屯長安故城至並聽敎延安上郡雕陰皆請降丙子淵引軍西行所過離宮園苑皆罷之出宮女還其親屬十月辛巳淵至長安營於春明門之西北諸軍皆集合二十餘萬淵命各依壘壁毋得入村落侵暴屢遣使至城下諭衛文昇等以欲尊隋之意不報辛卯命諸軍進圍城

十一月李淵克長安

十一月甲午李淵遷館於安興坊甲辰淵命諸軍攻城毋得犯七廟及代王宗室違者夷三族十一月丙辰軍頭雷永吉先登遂克長安代王在東宮左右奔散唯侍讀姚思廉侍側軍士將升殿思廉厲聲詞之曰唐公舉義兵匡帝室卿等毋得無禮衆皆愕然布立庭下淵迎代王於東宮遷居大興殿淵還舍于長樂宮與民約法十二條悉除隋苛禁戊午執陰世師等斬之死者十餘人餘無所問

性理范陽張氏曰隋失其鹿豪傑並起而逐之李密據洛口王世充據東都竇建德據山東以至薛舉蕭銑之徒莫不各據險要以爭進取惟唐高祖用秦王策獨決計入關關中既定遂尊立代王以號令天下除隋苛法以陰結民心收攬豪傑以經營

帝王開基 卷十一  
四方則天下之柄已在唐掌握中矣彼李密輩雖橫驚於外何益哉

尹氏曰興王氣象自與庸人不同李淵起兵至是才半載方收拔西河斬佞臣慰撫居民秋毫不犯義聲已昭布於遠近矣既而取霍邑克汾絳馮翊守潼關徇渭北兵威所至權枯粒朽遂大合諸軍爲攻圍之計未幾遂克長安雄據京邑是豈四方諸寇所能抗衡者哉惟合綱目先後所書而觀之則太宗所以肇造唐室者可謂帝王自有真矣

綱目考異曰通鑑李淵與民約法十二條悉除隋苛禁竊考漢元年書沛公入咸陽除秦苛法更始元年書大司馬秀至河北除莽苛政晉太康元年書遣使行荆楊除吳苛政則此漏除隋

苛禁四字

今會編補書

李淵立代王侑爲皇帝尊帝爲太上皇淵自爲大丞相封唐王

十一月壬戌李淵立代王爲帝遥尊煬帝爲太上皇甲子淵自長樂宮入長安自爲假黃鉞使持節大都督內外諸軍事尚書令大丞相進封唐王以武德殿爲丞相府改教稱令曰於虔化門視事乙丑榆林靈武平涼安定諸郡皆遣使請命丙寅詔軍國機務事無大小文武設官位無貴賤憲章賞罰咸歸相府置丞相府官屬以裴寂爲長史劉文靜爲司馬巳巳以建成爲世子世民爲秦公尹氏曰書尊帝何見唐兵之不以討賊名也故化及之弒不書太上皇不予唐之尊之也唐不正名自是書自爲大丞相書自加殊禮皆不隱矣

十二月薛舉侵扶風唐王淵遣秦公世民擊敗之

薛舉遣其子仁果寇扶風唐弼據汧源拒之仁果襲破之弼走詣扶風請降扶風太守竇璡殺之舉勢益張衆號三十萬謀取長安聞唐王已定長安遂圍扶風唐王使秦公世民將兵擊之又使姜暮竇軌將俱出散關安撫隴右左光祿大夫李孝恭招慰山南府戶曹張道源招慰山東癸巳世民擊薛仁果於扶風大破之追奔至隴坻而還乙未平原留守張隆

河池太守蕭瑀以郡降唐唐王淵遣李孝恭張道源招撫山南山東諸州下之屈突通降唐唐遣通招河東通守堯君素不下唐王淵遣使徇巴蜀下之

丁酉河池太守蕭瑀及扶風漢陽郡相繼來降姜暮竇軌進至長道爲薛舉所敗引還王使通議大夫劉世讓安集唐弼餘黨與舉相遇爲舉所虜孝恭擊破朱粲降者皆釋之於是自金川出巴蜀檄書所至降附者三十餘州屈突通與劉文靜相持月餘通使桑顯和夜襲其營文靜與段志玄力戰敗之突通聞長安不守乃留顯和鎮潼關引兵東出將趣洛陽通適去顯和卽以城降文靜追通執之送長安唐王以爲兵部尚書賜爵蔣公遣通至河東城下招諭堯君素君素不下劉文靜等引兵東略地取弘農郡遂定新安以西甲辰李唐王遣雲陽令詹俊武功縣正李仲袞徇巴蜀下之

尹氏曰淵旣帝侑則皆隋也書降唐何紀實也淵以名尊侑綱目以實錄故蕭瑀屈突通皆書降唐遣招山南山東河東皆書

唐遣

戊寅

隋煬帝大業十四年唐高祖武德元年

春正月唐王淵自加殊禮

正月丁未朔隋主詔唐王劔履上殿贊拜不名唐王既克長安以書諭諸郡縣於是東自商洛南盡巴蜀郡縣長史及盜賊渠帥氏羌酋長爭遣子弟入見請降有司復書日以百數

魏公密敗隋王世充于洛北唐遣世子建成秦公世民救東都

李密大敗王世充於洛口世北走河陽越王侗召還東都收兵屯含嘉城密乘勝進據金墉城未幾擁兵三十萬陳於北邙南逼上春門東都出兵拒之軍皆潰戊辰唐王以世子建成爲左元帥秦公世民爲右元帥督諸軍十餘萬人救東都二月己卯唐王遣太常卿鄭元璠將兵出商洛徇南陽左領軍府司馬馬元規徇安陸及荆襄三月己酉以齊公元吉爲鎮北將軍都督十五郡諸軍事聽以便宜從事

三月宇文化及弒其君廣於江都立秦王浩唐王淵自爲相國

煬帝至江都虎賁郎將司馬德勘與趙行樞宇文智及兄化及等作亂弒煬帝及其諸子化及自稱大丞相立秦王浩爲帝以兵守之乙卯唐王徙秦公世民爲趙公戊辰隋恭帝詔以十郡益唐國仍以唐王爲相國總百揆唐國置丞相以下官又加九錫王謂僚屬曰此諂諛者所爲耳孤東大政而自加寵錫可乎必若循魏晉之迹彼皆繁文僞飾欺天罔人考其實不及五霸而求名欲過三王此孤常所非笑竊亦恥之或曰歷代所行也亦何廢王曰堯舜湯武各因其時取與異道皆推其至誠以應天順人未聞夏商之

未必放唐虞之禪也若使少帝有知必不肯為若其無知孤自尊而飾讓平生素心所不為也但改丞相為相國府其九錫殊禮皆歸之有司

范氏曰唐高祖可謂不自欺矣然其以兵取而必曰受禪是未免襲衰世之迹也

朱子曰漢高祖取天下却正當為他直截恁地做去無許多委曲唐初隋大亂如此高祖太宗因羣盜之起直截如此做去只是誅獨夫為他心中打不過又立恭帝假援回護委曲亦何必耳所以不及漢之創業也又曰唐高祖辭得九錫極是

尹氏曰嗚呼唐室之興庶幾乎正矣乃忽於是見聞之故而蹈昔人篡奪之故智實有欲得之心而又立幼君以輔之自為大丞相加殊禮然後取焉曷不於起兵之初傳檄天下聲隋廣弑送之罪數其淫虐之惡播告四方興弔民伐罪之師豈不名正而言順理直如氣壯哉則其得國也雖不能如湯武之正然亦庶幾矣惜乎一時君臣不明大義此其創業所以不及漢高也歟然其得國比之於他則固優矣

胡氏曰湯武之於桀紂為君則臣之天命殛之則伐之固不虛為臣之之名而實為

弑父之賊而舉師是故節目繁多詭正並用興王之術駁而不懿也夫殊禮固不可自加也前日都督丞相唐王之命果由恭帝耶能言湯武之誠而不悟在已之多偽由不學之故也

卮言曰後世之事不可以前代論也古者天子諸侯各治其民

而諸侯以天子爲共主善惡易見也商周世爲諸侯修德行仁而人心歸之桀紂無道湯武舉兵率諸侯入其國誅其君而天下平矣後世以天子之吏民欲取天子而代之豈易言乎是以漢高借資於三楚光武從事於寇兵審時度勢而後事可就也隋煬之暴過於桀紂唐室之興比於湯武然不敢以誅獨夫爲名者何也當時羣雄雖起而據土分爭不相統一隋政雖亂而宗室子弟尚有其人有豪傑若堯君素者奉之以令天下則大事去矣高祖太宗入關而立代王隱然居重馭輕之勢不必誅煬帝而獨夫自無所容不必合羣雄而天下莫能與爭矣方楊玄感之起兵也每誓衆曰我於富貴無所未但爲天下解倒懸之危耳數帝罪惡而討之衆皆悅當其時豈不痛快而卒以敗者不審時而度勢也觀高祖之復李密曰殪商辛於牧野所不忍言繫子嬰於咸陽未敢聞命及煬帝被弑高祖哭之慟曰吾北面事人失道不能救敢忘哀乎由此觀之煬帝尚存高祖亦未必必加兵也煬帝死然後廢代王而代之代王之立不半歲耳豈若魏晉篡竊之爲哉

夏四月唐世子建成等還長安

通鑑曰時吳興太守沈法興舉兵以討化及爲名據江表十餘郡自稱江南道大總管樂安人盧祖尚據光州自稱刺史陳國公竇抗唐王之妃兄也煬帝使行長城於靈武間唐王定關中癸酉帥靈州鹽川等數郡來降夏四月稽胡寇富平

縣屬京兆郡

將軍王師仁

擊破之又五萬餘人寇宜春相國府諮議參軍竇軌將兵討之戰



於黃欽大破之世子建成等至東都軍於芳華苑東都閉門不出  
遣人招諭不應李密出軍爭之小戰各引去城中多欲爲內應者  
趙公世民曰吾新定關中根本未固雖得東都不能守也遂不受  
置新安宜陽二郡使行軍總管史萬寶盛彥師鎮宜陽呂紹宗任  
瓌將兵鎮新安而還初五原道守張長遜以中原大亂舉郡附突  
厥突厥以爲割利特勒郝瑗說薛舉與梁師都及突厥連兵以取  
長安舉從之時啓民可汗之子咄苾號莫賀咄設建牙直五原之  
北舉遣使與莫賀咄設謀入寇莫賀咄設許之唐王使都水監宇  
文歆賂莫賀咄設且爲陳利害止其出兵又說莫賀咄設遣張長  
遜入朝以五原之地歸之中國莫賀咄設並從之己卯武都宕渠  
五原等郡皆降王卽以長遜爲五原太守長遜又詐爲詔書與莫

賀咄設示知其謀莫賀咄設乃拒舉師都等不納其使戊戌世子  
建成等還長安蕭銑稱帝于襄陽徙都江陵於是東自九江西抵  
三峽南盡交趾北距漢川銑皆有之煬帝凶問至長安唐王哭之  
慟曰吾北面事人失道不能救敢忘哀乎五月山南撫慰使馬元

規擊朱粲於冠軍破之

冠軍縣屬南陽郡

五月唐王淵稱皇帝

唐書戊午隋恭帝詔曰天禍隋國太行太上皇遇盜江都酷甚望  
夷讜深驪北憫予小子奄造丕愆哀號永感心情糜潰仰惟荼毒  
仇復靡申形影相弔罔知啓處相國唐王膺期命世扶危拯溺自  
北徂南東征西怨致九合於諸侯決百勝於千里糾率夷夏大庇  
眚黎保久朕躬繫主是賴德侔造化功格蒼旻兆庶歸心曆數斯

帝王開基 卷十一  
在屈為人臣載違天命在昔虞夏揖讓相推苟非重華誰堪命禹  
當今九服崩離三靈改卜大運去矣請避賢路兆謀布德顧已  
莫能私僮命駕須歸藩國予本代王及予而代天之所廢豈其如  
是庶憑稽古之聖以誅四凶幸值惟新之恩預充三恪雪冤恥於  
皇祖守禋祀為孝孫朝聞夕殞及泉無限今遵故事遂于舊邸庶  
官羣辟改事唐朝宜依前典趨上尊號若釋重負感兼懷假手  
人俾除醜逆濟濟多士明知朕意仍勅有司凡有表奏皆不得  
以聞遣使持節兼太保刑部尚書光祿大夫梁郡公蕭造兼太尉  
司農少卿裴之隱奉皇帝璽綬于唐唐王辭讓百寮上表勸進至  
于再三乃從之隋帝遂于舊邸改大興殿為太極殿甲子唐王即  
皇帝位於太極殿

告南郊文曰維有隋義二年五月乙巳朔二十日甲子皇帝

臣某

敢昭告於昊天上帝伏以生人以來樹之司牧眷命所矚謂之大  
寶曆數弗在因或偷安故舜禹至公揖讓而興虞夏湯武兼濟干  
戈以定殷周事乃殊途功成一致後之創業咸取則焉臣恭承家

慶世祿降及曰祖曰考累功累德賜履參墟建侯唐社地居戚里  
門號公宮不緒隆基足為榮矣但有隋爽德屬饜大業饑饉師旅  
民胥怨咨謫見咎徵昭于玄鑒備聞卑聽所不忍言臣恭守晉陽  
馳心魏闕被首濡足拯溺救焚大舉義兵式寧區宇徵要荒之辨  
髮輯兆庶之離心誓以捐軀救茲人命指陳喪亂期之又安有功  
繼世無希九五惟身與子竭誠盡力率先鋒鏑誓以無貳載蒙弘  
誘克濟艱難電掃風驅廓清大邑傳檄而定岷峨拱手而平關隴

西戎卽敘東夷底定非啓非贊孰能茲速尊位世嫡翊奉宗隋戮力奉政無虧臣節值鼎祚云革天祿告移謳歌獄訟聿來唐邸人符神瑞輻湊微躬遠近宅心華夷請命少帝知期運已去大命有適遜位而禪若隋之初讓德不嗣羣臣逼請今六宗乏祀七政未齊罪有所歸恐當天譴請因吉日設壇告類祇畏上帝惠茲下民翼子謀孫罔敢愆德則小則大無惑無違對越鴻休伏深慙懼謹遣太尉某用薦告之禮瑞冊蒼璧香笈明粢嘉蔬禋祀于皇皇后帝明靈降享仍改義寧二年爲武德元年大赦天下

劉氏曰漢唐皆以兵取天下者也漢高書卽皇帝位此其書稱皇帝何唐之兵不以討賊名也故綱目書自爲大丞相封唐王書自加殊禮書自爲相國加九錫書稱皇帝與魏晉以下無異矣

葉氏曰天下有難取者有易取者自周衰天下分裂已六七百年正當欲合之時故先合於秦秦不足以受之而後合於漢故漢取之易西晉之後天下分裂又三四百年亦當欲合之時故先合於隋隋不足以受之而後合於唐故唐取之亦易若三國十六國皆乘天下之始分所以難也

隋越王侗稱皇帝

東都留守官閻煬帝凶問奉越王侗卽皇帝位王世充爲納言突厥遣使如唐

唐初起兵資突厥兵馬前後餉遺不可勝紀突厥恃功驕倨每遣使者至長安多暴橫唐主優容之

唐定律令置學校

尹氏曰秦人焚書坑儒至漢始開學校隋人廢黜儒學至唐始置  
學校吾道固不以是而隆汗而漢唐之所以立國者則有其本矣  
故特書之

學海君道部卷之一百三十六

匏瓠編

創業類

帝王開基三十

大業篇八

太宗平天下章

戊寅

唐高祖  
武德元

夏六月唐立世子建成爲秦王元吉爲齊王

尹氏曰觀高祖之得天下大抵出於秦王也使無秦王高祖且不  
得安其祿位保其身家况有天下之大哉高祖有言今日破家滅  
軀亦由汝化家爲國亦由汝是則唐三百年之基業肇於秦王其  
當有天下無疑也高祖於是時蓋召建成明諭以其基業所由興  
之故非世民無以有今日俾其明白推讓則建成有讓國之美世

民無推刃之慙萬一建成不從則質以至誠察其由衷之言至再至三表裏面背始終無間然後建儲貳之位必至於兩全而後已則父子之道得兄弟之好終君臣之分定而國家安於磐石矣惜乎計不出此厥後骨肉相殘爲古今之大惡悲夫

秋七月唐秦王世民與秦主舉戰于高墟敗績

二月郝瑗說薛舉與梁師都及突厥連兵以取長安舉從之突厥拒舉師都等不納其使夏六月癸未薛舉寇涇州以秦王世民爲大元帥將八總管兵以拒之七月薛舉進逼高墟游兵至于豳岐秦王世民深溝高壘不與戰會世民得瘡疾委軍事於長史納言劉文靜司馬殷開山且戒之曰薛舉懸軍深入食少兵疲若來挑戰慎勿應也俟吾疾愈爲君等破之開山退謂文靜曰王慮公不能

先辦故有此言耳且賊聞王有疾必輕我宜耀武以威之乃陳於高墟西南恃衆而不設備舉潛師掩其後壬子戰于淺水原八總管皆敗士卒死者什五六大將軍慕容羅睺李安劉弘基皆沒世民引兵還長安舉遂拔高墟收唐兵死者爲京觀文靜等皆坐除名

八月秦主舉卒子仁杲立

八月薛舉遣其子仁杲進圍寧州刺史胡演擊却之郝瑗言於舉曰今唐兵新破關中騷動宜乘勝直取長安舉然之會有疾而止辛巳舉卒太子仁杲立居於折墟城謚舉曰武帝己丑以秦王世民爲元帥擊薛仁杲

劉氏曰凡國主書卒存正統也於是夷隋於列國矣則其卒秦

主何將予唐以正統也

八月唐立李軌為涼王唐遣秦王世民伐秦

唐主欲與李軌共圖秦隴遣使招撫之謂之從弟軌大喜遣弟入

貢遂冊拜軌為涼王

魏公密與隋戰大敗遂以其眾降唐

唐將軍劉感鎮涇州薛仁果圍之唐長平王叔良將兵至仁果偽

遁又遣高墀人偽以城降叔良命感帥眾赴之大敗仁果擒感復

圍涇州令感語城中云援兵已敗不如早降感許之至城下大呼

曰逆賊亡在旦夕秦王帥四十萬眾四面俱集城中勉之仁果怒

殺之

尹氏曰隋氏負不義之名故雖有効命致死之臣皆不得書今

德方新是以劉感首以死節特書於冊綱目之去取如此

唐遣使如突厥突厥遣使報之

唐遣鄭元璠以女妓賂始畢可汗始畢遣使報之唐主與之宴引

升御坐以寵之

隋宇文文化及弒秦王浩自稱許帝

冬十月唐以李密為光祿卿封邢國公

李密將至唐主遣使迎勞相望密喜曰我擁眾百萬解甲歸唐功

亦不細豈不以台司見處乎至長安乃拜光祿卿賜爵邢國公密

大失望

朱粲自稱楚帝取唐鄧州刺史呂子臧死之

冬十一月秦王世民破秦兵圍析墟秦王仁果出降

薛仁果之爲太子也與諸將多有隙及卽位衆心猜懼郝瑗哭舉  
得疾遂不起由是國勢寢弱秦王世民至高墪仁果使宗羅喉將  
兵拒之羅喉數挑戰世民堅壁不出諸將咸請戰世民曰我軍新  
敗士氣沮喪賊恃盛而驕有輕我心宜閉壘以待之彼驕我奮可  
一戰而克也乃令軍中曰敢言戰者斬相持六十餘日仁果糧盡  
其將梁胡郎等帥所部來降世民知仁果將士離心命行軍總管  
梁實營於淺水源以誘之羅喉大喜盡銳攻之甚急世民度賊已  
疲謂諸將曰可以戰矣遲明使右武侯大將軍龐玉陳於淺水原  
南羅喉併兵擊之玉戰幾不能支世民引大軍自原北出其不意  
羅喉列兵還戰世民帥驍騎數十先陷陣唐兵表裏奮擊呼聲通  
地羅喉士卒大潰斬首數千級世民帥二千餘騎追之實軌叩馬

苦諫曰仁果猶據堅城雖破羅喉未可輕進請且按兵以觀之世  
民曰吾慮之久矣破竹之勢不可失也舅勿復言遂進仁果陳於  
城下世民據涇水臨之仁果驍將渾幹等數人臨陣來降仁果懼  
引兵入拒守日向暮大軍繼至遂圍之夜半守城者率自投下仁  
果計窮巴西出降得其精兵萬餘人男女五萬口諸將皆賀因問  
曰大王一戰而勝遽捨步兵又無攻具輕騎直造城下衆皆以爲  
不克而卒取之何也世民曰羅喉所將皆隴外之人將驍卒悍吾  
特出其不意而破之斬獲不多若緩之則皆入城仁果撫而用之  
未易克也急之則散歸隴外折墟虛弱仁果破膽不暇爲謀此吾  
所以克也衆皆悅服世民所得降卒悉使仁果兄弟及宗羅喉翟  
長孫等將之與之射獵無所疑間賊畏威銜恩皆願効死世民聞

褚亮名求訪獲之禮遇甚厚引爲王府文學唐主遣使謂世民曰  
薛舉父子多殺我士卒必盡誅其黨以謝冤魂李密諫曰薛舉虐  
殺不辜此其所以亡也陛下多訾焉懷服之民不可不撫乃命戮  
其謀首餘皆赦之癸亥秦王世民至長安斬仁杲於市唐主享勞  
將士謂群臣曰諸公共相翊戴以成帝業若天下承平可共保富  
貴使王世充得志公輩豈有種乎如仁杲君臣豈可不以爲鑒也  
唐以秦王世民爲陝東大行臺

夏王建德取深冀易定等州唐以羅藝爲幽州總管擊夏兵敗之

初王須拔掠幽州死其將魏刀兒代領其衆據深澤掠冀定夏王  
竇建德并其衆易定亦降遂攻冀州拔之建德與高開道各遣使  
招羅藝藝曰二子皆劇賊耳唐公乃吾主也遂與漁陽上谷諸郡

皆奉表降唐唐以爲幽州總管其將薛萬徹薛萬均亦皆授以官  
爵建德帥衆十萬寇幽州藝遣萬均擊破之建德引還

唐以西突厥曷娑那可汗爲歸義王

西突厥曷娑那獻大珠唐主曰珠誠至寶然朕寶王赤心珠無所  
用竟還之

唐遣李密收撫山東李密叛行軍總管盛彥師討斬之

李密遇大朝會職當進食深恥之退以告王伯當伯當曰天下事  
在公度內耳乃請往山東收其故時之衆唐主許之引升御榻飲  
勞甚厚又以伯當爲副而遣之旣出關長史張寶德上封事言密  
必叛唐主乃敕密還更受節度密遂斬使者入桃林縣驅掠徒衆  
直趣南山行軍總管盛彥師邀擊斬之并伯當傳首長安



已卯

唐武德二

春二月唐淮安王神通擊宇文化及於魏縣走之

淮安楊士林擊破朱粲唐以為顯州行臺朱粲降唐唐以為楚王

夏王建德破宇文化及于聊城誅之

唐以宇文士及為上儀同封德彝為內史侍郎

初唐王與宇文士及善化及既死手詔召之士及與封德彝來降

時士及妹為昭儀由是授上儀同唐主以德彝諂巧不忠罷遣就

舍德彝尋以秘策于唐主唐主悅拜內史舍人俄遷侍郎

隋王世充侵唐穀州

王世充以秦叔寶程知節為將軍待之皆厚然二人疾世充多詐

知其無成至是世充與唐兵戰於九曲叔寶知節以數十騎西馳

降于唐秦王世民聞其名厚禮之以叔寶為總管知節為統軍既

而將軍李君羨田留安亦降於唐世民置君羨左右以留安為統  
軍

卮言曰宇文士及弒逆之族封德彝諂巧不忠唐高祖之所知

也乃以其私昵寘之顯職此豈興王盛世所宜有乎太宗識名

將於降虜中而羅之麾下卒得其用兩者之趣相去遠矣唐之

業微太宗殆哉

隋東海北海東平須昌淮南諸郡皆降于唐

隋王世充自稱鄭王

夏四月定揚可汗武周擊唐并州取榆次

楚王朱粲殺唐使者奔東都鄭王世充稱帝

定揚可汗武周圍唐并州齊王元吉拒却之

帝王開基 卷十三  
鄭王世充取唐伊州總管張善相死之

唐遣安興貴襲執涼主軌以歸殺之河西平

李軌將安修仁兄興貴在長安表請說軌唐主曰軌阻兵恃險豈  
口舌所能下興貴曰臣家在涼州奕世豪望為民夷所附弟修仁  
為軌所信任軌聽臣固善若其不聽圖之易矣唐主乃遣之興貴  
至乘間說軌曰涼地不過千里土薄民貧今唐起太原取函秦宰  
制中原戰勝攻取此殆天啓非人力也若往歸之則實融之功復  
見於今日矣軌曰吾據山河之固必若我何汝自唐來為唐遊說  
耳興貴退與修仁陰結諸胡起兵擊軌執之以聞河西悉平軌使  
鄧曉在長安舞蹈稱慶唐主曰汝為人使臣聞國亡而不戚既不  
忠於李軌其肯為朕用乎遂廢之軌至長安伏誅

五月鄭王世充弒隋主侗

六月定楊將宋金剛擊唐并州唐以裴寂為總管拒之

秋七月唐以徐圓朗為兗州總管

海岱賊帥徐圓朗以數州降唐以為兗州總管

鄭人侵唐穀州刺史任瓌大破之西突厥高昌遣使入貢于唐

八月唐鄴公薨

劉氏曰自陳留王曹真卒是後代興之際廢主皆弒無有以卒書  
者於是復見若唐主可謂近厚矣其永世也宜哉綱目前書用其  
宗室此書鄴公薨皆予之也

夏王建德取唐邢滄洛相州

是冬又克唐黎陽虜淮安王神通  
李世勣降遂取衛滑齊兗等州

梁王師都以突厥寇延州唐總管段德操擊破之

沈法興稱梁王於毗陵李子通稱吳帝於江都  
杜伏威降唐唐以為和州總管

唐裴寂軍潰定揚可汗武周取并州齊王元吉奔長安

夏王建德取唐趙州冬唐賜羅藝姓李氏藝破夏兵於衡水

梁主銑遣兵侵唐陝州刺史許紹擊破之

定揚將宋金剛取周澶州遣秦王世民擊之

十月劉武周將宋金剛進攻澶州陷之軍勢甚銳裴寂性怯無將

帥之略唯發使駱驛趣虞秦二州收民入城堡焚其積聚民驚擾

愁怨皆思為盜夏縣民呂崇茂聚眾自稱魏王以應武周寂討之

為所敗詔永安王孝基工部尚書獨孤懷恩陝州總管于筠內史

侍郎唐儉將兵討之時王行本猶據蒲阪未下亦與武周相應關

中震駭唐主手敕曰賊勢如此難與爭鋒宜棄大河以東謹守關

西而已秦王世民上表曰太原王業所基國之根本河東殷實京

邑所資若舉而棄之臣竊憤恨願假臣精兵三萬必冀平殄武周

克復汾晉唐主於是悉發關中兵以益世民所統使擊武周乙卯幸

華陰至長春宮以送之十一月己卯武周寇涪州秦王世民引兵

自龍門乘冰堅度河屯栢壁與宋金剛相持時河東州縣倖掠之

餘未有倉廩人情恒擾聚入城堡徵歛無所得軍中乏食世民發

教諭民民間世民為帥而來莫不歸附自近及遠至者日多然後

漸收其糧軍食以充乃休兵秣馬唯令偏裨乘間抄掠大軍堅壁

不戰由是賊勢日衰世民嘗自帥輕騎覘敵騎皆四散世民獨與

一甲士登丘而寢俄而賊兵四合初不之覺會有蛇逐鼠觸甲士

之面甲士驚寤遽白世民俱上馬馳百餘步爲賊所及世民以大羽箭射殪其驍將賊騎乃退十二月于筠說永安王孝基急攻呂崇茂獨孤懷恩請先成攻具然後進孝基從之崇茂求救於金剛金剛遣其將吾陽尉遲敬德尋相將兵奄至夏縣孝基表裏受敵軍遂大敗孝基懷恩唐儉及行軍總管劉世讓皆爲所虜敬德名恭以字行唐主徵裴寂入朝責其敗軍下吏旣而釋之寵待彌厚尉遲敬德尋相將還澮州秦王世民遣兵部尚書殷開山總管秦叔寶等邀之於美良川大破之斬首二千餘級頃之敬德相潛引精騎援王行本於蒲阪世民自將步騎三千從間道夜趨安邑邀擊大破之敬德相僅以身免悉俘其衆復歸栢壁諸將咸請與宋金剛戰世民曰金剛懸軍深入精兵猛將咸聚於是武周據太原

倚金剛爲扞蔽金剛軍無蓄積以虜掠爲資利在速戰我閉營養銳以挫其鋒分兵汾隰衝其心腹彼糧盡計窮自當遁走當待此機未宜速戰孝基謀逃歸武周殺之

庚辰

唐武德三

春三月唐克蒲阪隋守將王行本降

夏四月唐秦王世民擊宋金剛破之定揚可汗武周及金剛皆走死三月乙丑劉武周遣其將張萬歲寇浩州李仲文擊走之俘斬數千人甲申行軍副總管張綸敗劉武周於浩州俘斬千餘人劉武周數攻浩州爲李仲文所敗宋金剛軍中食盡四月丁未金剛北走秦王世民追之秦王世民追及尋相於呂州大破之乘勝逐北一晝夜行二百餘里戰數十合至高壁嶺總管劉弘基執轡諫曰大王破賊逐北至此功亦足矣深入不已不愛身乎且士卒飢疲

宜留壁於此俟兵糧畢集然後復進未晚也世民曰金剛計窮而走衆心離沮功難成而易敗機難得而易失必乘此勢取之若更淹留使之計立備成不可復攻矣吾竭忠殉國豈顧身乎遂策馬而進將士不敢復言飢追及金剛於雀鼠谷一日八戰皆破之俘斬數萬人夜宿於雀鼠谷西原世民不食二日不解甲三日矣軍中止有一羊世民與將士分而食之丙辰陝州總管于筠自金剛所逃來世民引兵趣介休金剛尚有衆二萬戊午出西門背城布陳南北七里世民遣總管李世勣等與戰小却爲賊所乘世民帥精騎擊之出其陳後金剛大敗斬首三千級金剛輕騎走世民追之數十里至張難堡浩州行軍總管樊伯通張德政據堡自守世民免胄示之堡中喜譟且泣左右告以王不食獻濁酒脫粟飯尉遲敬德收餘衆守介休世民遣任城王道宗宇文士及往諭之敬德與尋相舉介休及永安降世民得敬德甚喜以爲左一府統軍使將其舊衆八千與諸營相參屈突通慮其變驟以爲言世民不聽劉武周聞金剛敗大懼棄并州走突厥金剛收其餘衆欲復戰衆莫肯從亦與百餘騎走突厥世民至晉陽武周所署僕射楊伏念以城降唐儉封府廬以待世民武周所得州縣皆入於唐未幾金剛謀走上谷突厥追獲腰斬之嵐州總管劉六兒從宋金剛在介休秦王世民擒斬之其兄季真棄石州奔劉武周將馬邑高滿政滿政殺之武周之南寇也其內史令苑君璋諫曰唐王舉一州之衆直取長安所向無敵此乃天授非人力也晉州以南道路險隘縣軍深入無繼於後若進戰不利何以自還不如北連突厥南

結唐朝南面稱孤足爲長策武周不聽留君璋守朔州及敗泣謂君璋曰不用君言以至於此久之武周謀亡歸馬邑事泄突厥殺之唐主聞并州平大悅壬戌宴群臣賜繒帛使自入御府盡力取之復唐儉官爵仍以爲并州道安撫大使所籍獨孤懷恩田宅資財悉以賜之世民留李仲文鎮并州劉武周數遣兵入寇仲文輒擊破之下城堡百餘所詔仲文檢校并州總管

秋七月唐遣秦王世民督諸軍伐鄭

初王世充所部降唐者相繼至是唐主議擊世充世充聞之選諸州鎮驍勇皆集洛陽募人分守四城七月壬戌詔秦王世民督諸軍擊世充壬午世民至長安王世充遣其諸子鎮守諸城自將大兵以拒唐羅士信將前鋒圍慈澗王世充自將兵三萬救之己丑

秦王世民將輕騎前覘世充猝與之遇衆寡不敵道路險阨爲世充所圍世民左右馳射皆應弦而斃獲其左建威將軍燕琪世充乃退世民還營塵埃覆面軍不復識欲拒之世民免胄自言乃得入旦日帥步騎五萬進軍慈澗世充慈澗之戍歸于洛陽世民遣行軍總管史萬寶自宜陽南據龍門將軍劉德威自太行東圍河內上谷公王君廓自洛口斷其餉道懷州總管黃君漢自河陰攻迴洛城大軍屯於北邙連營以逼之世充洧州長史繁水張公謹與刺史崔樞以州城來降八月鄧州土豪執王世充所署刺史來降甲辰黃君漢遣校尉張夜叉以舟師襲迴洛城克之獲其將達奚善定斷河陽橋而還降其堡聚二十餘世充使太子玄應帥楊公卿策攻迴洛不克乃築越城於其西留兵戍之世充陳於青城

宮秦王世民亦置陣當之世充隔水謂世民曰隋室傾覆唐帝關中鄭帝河南世充未嘗西侵王忽舉兵東來何也世民使宇文士及應之曰四海咸仰皇風唯公遏阻聲教爲此而來世充曰相與息兵講好不亦善乎又應之曰奉詔取東都不令講好至暮各引兵還

胡氏曰唐帝長安鄭帝洛陽迹其所以取之未有大相過者故王世充有隔水之問而秦王所以答之者語雖大而理不暢也使唐初舉事若湯伐桀武伐紂沛公誅無道秦則其文告之辭豈止如是而已乎

卮言曰唐初舉兵甚正其取長安俾於漢自與王世充之盜襲劫奪者不同秦王答世充之語其理未嘗不暢

九月鄭顯州總管田瓚以二十五州降唐唐攻鄭轅轅拔之

九月癸酉王世充顯州總管田瓚以所部二十五州來降自是襄陽聲問與世充絕史萬寶進軍甘泉宮丁丑秦王世民遣右武衛將軍王君廓攻轅轅拔之王世充遣其將魏隱等擊君廓君廓僞遁設伏大破之遂東徇地至管城而還先是王世充將郭士衡許羅漢掠唐境君廓以策擊却之詔勞之曰卿以十三人破賊一萬自古以少制衆未之有也世充尉州刺史時德睿帥所部犯夏陳隋許賴尉七州來降秦王世民以便宜命州縣官並依世充所署無所變易改尉州爲南汴州於是河南州縣相繼來降辛巳世民以五百騎行戰地登魏宣武陵王世充帥步騎萬餘猝至圍之單雄信引衆直趨世民尉遲敬德躍馬大呼橫刺雄信墜馬世充兵

稍却敬德翼世民出圍世民敬德更帥騎兵還戰出入世充陣往  
返無所礙屈突通引大兵繼至世充兵大敗僅以身免擒其冠軍  
大將軍陳智略斬首千餘級獲排稍兵六千十月甲午王世充大  
將軍張鎮州來降甲辰行軍總管羅士信襲王世充硤石堡拔之  
士信又圍千金堡堡中大罵之士信夜遣百餘人抱嬰兒數十至  
堡下使兒啼呼詐云從東都來歸羅總管既而相謂曰此千金堡  
也吾屬誤矣卽去堡中以為士信已去來者洛陽亡人出兵追之  
士信伏兵於道伺其門開突入屠之

冬十月夏王建德圍幽州高開道遣使降唐

鄭管榮汴州降唐

李密之敗也楊慶歸洛陽世充以為管州總管妻以兄女秦王世

民逼洛陽楊慶潛遣人請降世民遣總管李世勣將兵往據其城  
慶來降拜上柱國郇國公時世充太子玄應鎮虎牢軍於滎汴之  
間聞之引兵趨管城李世勣擊却之使郭孝恪為書滎州刺史魏  
陸陸密請降玄應遣大將軍張志就陸徵兵丙辰陸擒志等四將  
舉州來降陽城令王雄帥諸堡來降秦王世民使李世勣應之以  
雄為嵩州刺史嵩南之路始通魏陸使張志詐為玄應書停其東  
道之兵令其將張慈實且還汴州又密告汴州刺史王要漢使圖  
慈實要漢斬慈實以降玄應聞諸州皆叛大懼奔還洛陽詔以要  
漢為汴州總管賜爵郟國公十一月戊子安撫大使李大亮取王  
世充沮華二州唐兵逼洛陽王世充遣使求救於竇建德建德遣  
使詣世充許以赴援又遣使詣唐請罷洛陽之兵秦王世民留之



不荅

十二月鄭許亳等十一州降唐唐峽州兵伐梁拔荆門鎮

十二月辛卯王世充許亳等十一州皆請降辛丑王世充隨州總管徐毅舉州降王世充遣其兄子代王琬長孫安世請竇建德報聘且乞師張道源從建德在河南密遣人詣長安請出兵攻洛州以震山東丙午詔劉世讓爲行軍總管使將軍出土門趣洛州

辛巳

唐武德四

春二月唐秦王世民敗鄭主世充於穀水進圍洛陽

正月王世充梁州總管程嘉會以所部來降杜伏威遣其將陳正通徐紹宗帥精兵二千來會秦王世民擊王世充甲申攻梁克之秦王世民選精銳千餘騎皆皂衣玄甲分爲左右隊使秦叔寶程知節尉遲敬德翟長孫分將之每戰世民親被玄甲帥之爲前鋒

乘機進擊所向無不摧破敵人畏之行臺僕射屈突通贊皇公竇軌將兵按行營屯粹與王世充遇戰不利秦王世民帥玄甲救之世充大敗獲其騎將葛彥璋俘斬六千餘人世充遁歸王世充太子玄應將兵數千人自虎牢運糧入洛陽秦王世民遣將軍李君邀擊大破之玄應僅以身免世及使宇文士及奏請進圍東都唐主謂士及曰歸語爾王今取洛陽止欲息兵克城之日乘輿法物圖籍器械非私家所須者委汝收之其餘子女玉帛並以分賜將士辛丑世民移軍青城宮壁壘未立王世充帥衆二萬自方諸門出憑故馬坊垣塹臨穀水以拒唐兵諸將皆怯世民以精騎陳於北邙魏宣武陵以望之謂左右曰賊勢窘矣悉衆而出徼幸一戰今日破之後不敢復出矣命屈突通帥步卒五千度水擊之戒通

曰兵交則縱煙煙作世民引騎南下身先士卒與通合勢力戰世民欲知世充陣厚薄與精騎數十衝之直出其背眾皆披靡殺傷甚眾既而限以長堤與諸騎相失將軍丘行恭獨從世民世充數騎追及之世民馬中流矢而斃行恭回騎相失射追者無不中追者不敢前乃下馬以授世民行恭於馬前步執

數人突陣而出得入大軍世充亦帥眾殊死戰散而復合者數四自辰至午世充兵始退世民縱兵乘之直抵城下俘斬七千人遂圍之驃騎將軍段志玄與戰充兵力戰深入馬倒為世充兵所擒兩騎夾持其髻將渡洛水志玄踊身而奮二人俱墜馬志玄馳歸追者數百騎不敢逼庚戌王秦棄河陽走其將趙瓊等以城來降別將軍雄信裴孝達與總管王君廓相持於洛口秦王世民帥步

騎五千援之至轅轅雄信等遁去君廓追敗之乙卯王世充懷州刺史陸善宗以城降秦王世民圍洛陽宮城城中守禦甚嚴大礮飛石重五十斤擲二百步八弓弩箭如車覆鏃如巨斧射五百步世民四面攻之晝夜不息旬餘不克城中欲翻城者凡十三輩皆不果發而死唐將士皆疲弊思歸總管劉弘基等請班師世民曰今大舉而來當一勞永逸東方諸州已望風款服唯洛陽孤城勢不能久功在垂成奈何棄之而去乃下令軍中曰洛陽未破師必不還敢言班師者斬眾乃不敢復言唐主聞之亦密敕世民使還世民表稱洛陽必可定又遣參謀軍事封德彝入朝面論形勢德彝言於唐主曰世充得地雖多率皆羈屬號令所行唯洛陽一城而已智盡力窮克在朝夕今若旋師賊勢復振更相連結後必難

圖唐主乃從之世民遣世充書諭以禍福世充不報戊午王世充  
鄭州司兵沈悅遣使詣左武侯大將軍李世勣請降左衛將軍王  
君廓夜引兵襲虎牢悅爲內應遂拔之獲其荆王行本及長史戴  
胄悅君理之孫也唐兵圍洛陽掘塹築壘而守之城中乏食絹一  
匹直粟三升布十匹直廩一升服飾珍玩賤如土芥民食草根木  
葉相盡相與澄取浮泥投米屑作餅食之皆病身腫脚弱死者相  
枕倚於道路秦主之遷民入官城也凡三萬家至是無二千家雖  
貴爲公卿糠覈不充尚書郎以下躬自負戴往往餒死竇建德使  
其將范願守曹州悉發孟海公徐圓朗之衆西救洛陽至滑州王  
世充行臺僕射韓洪開門納之已卯軍于酸棗

### 三月唐襲夏鄴城

竇建德普樂令程名振降唐唐使將兵徇河北名振夜襲鄴俘其  
男女千餘人去鄴八十里閱婦人乳有渾者九十餘人悉縱遣之  
鄴人感其仁

### 突厥寇汾陰

突厥頡利可汗士馬雄盛有馮陵中國之志王世充使人說之曰  
昔啓民奔隋賴文帝之力有此土室宇子孫享之今唐天子非文  
帝之子孫宜奉揚政道以伐之以報文帝之德頡利然之唐主以  
中國未寧待突厥甚厚而頡利求請無厭言辭驕慢至是舉衆寇  
汾陰

夏王建德將兵救鄭夏五月唐秦王世民大破擒之鄭主世充降

二月竇建德克周橋虜孟海公三月竇建德陷管州殺刺史郭士

安又陷滎陽陽翟等縣水陸並進汎舟運糧沂河西上王世充之弟徐州行臺世辨遣其將郭士衡將兵數千會之合十餘萬號三十萬軍於成臯之東原築宮板渚遣使與王世充相聞先是建德遺秦王世民書請退軍潼關返鄭侵地復修前好世民集將佐議之皆請避其鋒郭孝恪曰世充窮蹙垂將面縛建德遠來助之此天意欲兩亡之也宜據武牢之險以拒之伺間而動破之必矣記室薛收曰世充保據東都府庫充實所將之兵皆江淮精銳卽日之患但乏糧食耳以是之故爲我所持求戰不得守則難久建德親帥大衆遠來赴援亦當極其精銳致死於我若縱之至此兩寇合從轉河北之粟以饋洛陽則戰爭方始偃兵無日混一之期殊未有涯也今宜分兵守洛陽深溝高壘世充出兵慎勿與戰大王

親帥驍騎先據成臯厲兵訓士以待其至以逸待勞決可克也建德旣下世充旣破不過二旬兩主就縛矣世民善之收道衡之子也蕭瑀屈突通封德彝皆曰吾兵疲老世充憑守堅城未易猝拔建德席勝而來鋒銳氣盛吾腹背受敵非完策也不若退保新安以承其弊世民曰世充兵摧食盡上下離心不煩力攻可以坐克建德新破海公將驕卒惰吾據武牢扼其咽喉彼若冒險爭鋒吾取之甚易若狐疑不戰旬月之間世充自潰城破兵彊氣勢自倍一舉兩克在此行矣若不速進賊入武牢諸城新附必不能守兩賊併力其勢必彊何弊之承吾計決矣通等又請解圍據險以觀其變世民不許中分麾下使通等副齊王元吉圍守東都世民將驍勇三千五百人東巡武牢時正晝出兵歷北邙抵河南陽趨鞏

而去王世充登城望見莫之測也竟不敢出癸未世民出武牢甲申將驍騎五百出武牢東二十餘里覘建德之營緣道分留從騎使李世勣程知節秦叔寶將之伏於道旁纔餘四騎與之偕進世民謂尉遲敬德曰吾執弓矢公執槊相隨雖百萬衆若我何又曰賊見我而還上策也去建德營三里所建德遊兵遇之以爲斥候也世民大呼曰我秦王也引弓射之斃其一將建德軍中大驚出五六千騎逐之從者咸失色世民曰汝第前行吾自與敬德爲殿於是按轡徐行追騎將至則引弓射之輒斃一人追者懼而止止而復來如是再三每來必有斃者世民前後射殺數人敬德殺十許人追者不敢復逼世民遂巡稍却以誘之入於伏內世勣等奮擊大破之斬首二百餘級獲其驍將殷秋石瓚以歸乃爲書報建

德諭以趙魏之地久爲我有爲足下所侵奪但以淮安見禮公主得歸故相與坦懷釋怨世克項與足下修好已嘗反覆今亡在朝夕更飾辭相誘足下乃以三軍之衆仰哺他人千金之資坐供外費良非上策今前茅相遇彼遽崩摧郊勞未通能無懷愧故抑止鋒銳冀聞擇善若不獲命恐雖悔難追竇建德迫于武牢不得進留屯累月戰數不利將士思歸四月丁巳秦王世民遣王君廓將輕騎千餘抄其糧運又破之獲其大將軍張青特凌敬言於建德曰大王悉兵濟河攻取懷州河陽使重將守之更名鼓建旗踰太行入上黨徇汾晉趣蒲津如此有三利一則蹈無人之境取勝可以萬全二則拓地收衆形勢益疆三則關中震駭鄭圍自解爲今之策無以易此建德將從之而王世克遣使告急相繼於道王琬長

孫安世朝夕涕泣請救洛陽又陰以金玉啗建德諸將以撓其謀諸將皆曰凌敬書生安知戰事其言豈可用也建德乃謝敬曰今衆心甚銳天贊我也因之決戰必將大捷不得從公言敬因爭之建德怒令扶出其妻曹氏謂建德曰祭酒之言不可違也今大王自滏口乘唐國之虛連營漸進以取山北又因突厥西抄關中唐必還師自救鄭圍何憂不解若頓兵於此老師費財欲求成功在於何日建德曰此非女子所知喜來救鄭鄭今倒懸亾在朝夕吾乃捨之而去是畏敵而棄信也不可謀者告曰建德伺唐軍芻盡牧馬於河北將襲武牢五月戊午秦王世民北濟河南臨廣武察敵形勢因留馬十餘匹牧於河渚以誘之夕還武牢已未建德悉衆而至自板渚出牛口置陳北距大河西薄汜水南屬鵠山亾二

十里鼓行而進諸將皆懼世民將數騎升高丘以望之謂諸將曰賊起山東未嘗見大敵今度險而囂是無紀律逼城而陳有輕我心我按兵不出彼勇氣自衰陳亾卒饑勢將自退追而擊之無不克者與公等約過日中必破之矣建德意輕唐軍遣三百騎涉汜水距唐營一里所止遣使與世民相聞曰請選銳士數百與之戲世民遣王君廓將長槊二百以應之相與交戰乍進乍退兩無勝負各引還王琬乘隋煬帝驄馬鎧仗甚鮮迥出陳中以誇衆世民曰彼所乘真良馬也尉遲敬德請往取之世民止之曰豈可以一馬喪猛士敬德不從與高甌生梁建方三騎直入其陳擒琬引其馬以歸衆無敢當者世民使召河北馬待其至乃出戰建德列陳自辰至午士卒飢倦皆坐列又爭飲水遂巡欲退世民命宇文士

及將三百騎經建德陳西馳而南上戒之曰賊宜不動爾宜引歸動則引兵東出及至陳前陳果動世民曰可擊矣時河渚馬亦至乃命出戰世民帥輕騎先進大軍繼之東涉汜水直薄其陳建德羣臣方朝謁唐騎猝來朝臣趨就建德建德召騎兵使拒唐兵騎兵阻朝臣不得過建德揮朝臣令却進退之間唐兵已至建德窘迫退依東陂竇阮引兵擊之戰小不利世民帥騎赴之所向皆靡淮陽王道玄挺身陷陳直出其後復突陳而歸再入再出飛矢集其身如蝟毛勇氣不衰射人皆應弦而仆世民給以副馬使從已於是諸軍大戰塵埃漲天世民帥史大柰程知節秦叔寶宇文歆等卷旆而入出其陳後張唐旗幟建德將士顧見之大潰追奔三十里斬者二千餘級建德中契竄匿於牛口渚車騎將軍曰士讓

揚武威逐之建德墮馬士讓援槊欲刺之建德曰勿殺我我夏王也能富貴汝武威下擒之載以從馬來見世民世民讓之曰我自討王世克何預汝事而來越境犯我兵鋒建德曰今不自來恐煩遠取建德將士皆潰去所俘獲五萬人世民即日散遣之使還鄉里封德彝入賀世民笑曰不用公言得有今日智者千慮不免一失乎德彝甚慙甲子王世克偃師鞏縣皆降乙丑以太子左庶子鄭善果爲山東道撫慰大使世克將王德仁棄故洛陽城而遁亞將趙季卿以城降秦王世民囚竇建德王琬長孫安世郭世衡等至洛陽城下以示世克世克與建德語而泣仍遣安世等入城言敗狀世克召諸將議突圍走襄陽諸將皆曰吾所恃者夏王夏王今已爲擒雖得出終必無成丙寅世克素服帥其太子羣臣二千

餘人詣軍門降世民禮接之世充俯伏流汗世民曰卿常以童子見處今見童子何恭之甚邪世克頓首謝罪於是部分諸軍先入洛陽分守市肆禁止侵掠無敢犯者丁卯世民入宮城命記室房玄齡先入中書門下省收隋圖籍制詔已爲世克所毀無所獲命蕭瑀竇軌等封庫收其金帛班賜將士收世克之黨罪尤大者段達單雄信朱粲等十餘人斬之秦王與關門蘓威請見稱老病不能拜秦王遣人數之曰公隋室宰相危不能扶使君弑國亡見李密王世充皆拜伏舞蹈今既老病何勞相見秦王觀隋宮殿歎曰逞侈心窮人欲無亡得乎命撤端門樓焚乾陽殿毀則天門闕廢諸道場建德餘衆走至洛州欲立建德養子爲主徵兵以拒唐僕射齊善行曰今喪則如此必無所成不若委心請命於唐乃與

裴矩曹旦帥百官奉建德之妻曹氏及使國八璽請降于於唐王世充弟世辯亦以徐宋等三十八州請降淮安王神通又并破宇文化及所得珍寶請降于唐唐王以善行爲秦王左二護軍仍厚賜之戊寅王世充弟世辯以徐宋等三十八州詣河南安撫任瓌請降世充故地悉平竇建德博州刺史馮士羨復推淮安王神通爲慰撫山東使徇下三十餘州建德之地悉平

胡氏曰蘓威罪固大矣比之封德彝裴矩宇文士及之徒不有間乎秦王能青蘓威而不能戮德彝等及寵任之其失甚矣

秋七月唐秦王世民至長安獻俘太廟赦王世充斬竇建德

七月甲子秦王世民至長安被黃金甲齊王元吉二十五將從其後鐵騎萬匹甲士三萬人前後部鼓吹俘王世充竇建德獻于太



廟行飲至之禮以饗之唐王見王世充而數之世充曰臣罪固當  
誅然秦王許臣不死丙寅詔赦世充為庶人與兄弟子姪徙處蜀  
新建德于市唐王以天下略定大赦百姓給復一年陝虢轉輸勞  
費幽州久隔寇戎皆復二年既而王竇餘黨尚有遠徙者孫伏伽  
上言兵食可去信不可去陛下已赦而復徙之使臣民何所馮依  
且世充尚蒙寬宥况於餘黨所宜縱釋唐王從之世充未行定州  
刺史獨孤修德矯敕殺之詔免修德官

胡氏曰王竇皆非唐之叛臣也而世充事煬不忠又致隋失天  
下又弑恭帝而自立淫刑以逞虐及無罪其罪為重宜數其罪  
而戮之而待建德以不死則刑有章矣而唐不然其不戮世充  
也得非內省有疚與其誅建德也無乃畏惡其能與已而使人

楷殺世充豈所謂與眾棄之與

尹氏曰太宗英武蓋世漢高光之儔而王竇以盜賊之靡當之  
宜乎折北不支殆甚於摧枯拉朽也或曰太宗比高光孰優曰  
太宗弱冠起義克長安平羣盜如反掌兵鋒未嘗少衄所向無  
前非才能過人安能至此使處光武之地固優為之若遇漢高  
之事恐未易言何則漢祖起亭長首以誅無道秦為名初無挾  
詐詭秘之術固已高人一等然入關未幾即制於項氏之手退  
處巴蜀乃能席卷三秦聲羽大逆之罪東向爭天下百敗而氣  
不折卒能摧折慄悍之人而斃之使太宗處此其少年英銳之  
氣恐未能如漢祖之隱忍况淮陰英彭董皆不世之才尤未易  
以籠絡駕御而高祖使之如嬰兒玩弄於股掌彼仁杲武周世

克建德等其勇畧曾不及英彭之一二况望項籍之萬分哉  
此所以知其未易辨也然天生英主各適其時要未容以槩論  
惟建德世克之死其是否則有可言者世克誠有罪然唐既受  
其降則不可殺彼亦自謂罪固當誅秦王許臣不死其辭甚  
直若建德則越境而來又於陳擒之戮之宜矣一赦一誅固非  
過也若夫蕭銑既降而死則唐始爲濫殺觀者又當以是攷之  
卮言曰王竇皆僭竊也然唐兵攻世克而建德遠求救之建德  
被擒而世克就降則其罪於唐有輕重焉故一赦一誅且太宗  
之意也及世克爲獨孤修德所殺而免其官恐不出於朝命要  
之仇敵俘虜自無存理太宗克洛陽禁侵掠及隨政誅朱粲等  
斯誠弔民伐罪之師矣

竇建德故將劉黑闥起兵漳南八月劉黑闥據歙縣唐遣兵擊之

唐徐圓朗舉兵應劉黑闥唐淮安王神通擊劉黑闥敗績

竇建德既死詔悉徵其故將於是范願高雅賢等謀作亂劉黑闥  
屏居漳南諸將告以其謀襲縣據之遂陷歙縣朝廷乃置山東道  
行臺於洛州以淮安王神通爲行臺僕射發關中步騎三千使將  
軍秦武通李玄通等擊之兗州總管徐圓朗與黑闥通謀遂舉兵  
反兗鄆陳杞伊洛曹戴等八州皆應之圓朗自稱魯王淮安王神  
通至冀州與黑闥戰於饒陽神通大敗黑闥兵勢大振  
冬十月唐以秦王世民爲天策上將

唐主以秦王功大前代官皆不足以稱之特置天策上將位在王  
公上以世民爲天策上將領司徒陝東道大行臺尚書令增邑二

萬戶仍開天策府置官屬以齊王元吉爲司空世民以海內浸平  
乃開館於宮西延四方文學之士出教以王府屬杜如晦記室房  
玄齡虞世南文學褚亮姚思廉主簿李玄道參軍蔡允恭薛元敬  
顏相時諮議典籤蘇勗天策府從事中郎于志寧軍諮祭酒蘇世  
長記室薛收倉曹李守素國子助教陸德明孔穎達信都蓋文達  
宋州總管府戶曹許敬宗並以本官兼文學館博士分爲三番更  
日直宿世民暇日輒至館中討論文籍或至夜分使庫直閣立本  
圖像褚亮爲贊號十八學士士大夫得預其選者時人謂之登瀛  
州時府僚多補外官如晦亦出爲陝州刺史世民患之房玄齡曰  
餘人不足惜至於杜如晦王佐之才大王欲經營四方非如晦不  
可世民曰微公言幾失之卽奏爲府屬與玄齡常從世民征伐參  
謀帷幄軍中多事如晦剖決如流世民每破軍克城諸將佐爭取  
寶貨玄齡獨收采人物致之幕府又將佐有勇略者玄齡必與之  
深相結使爲世民盡死力

丘氏濬曰世傳十八學士登瀛州蓋本諸此是時高祖在御建  
成爲太子固無恙也而高祖乃爲秦王特置天策上將開府置  
屬而秦王又自開館以延文學之士彼自延其府僚各仍本官  
所記室參軍典籤之屬相與講學而論治可也君父在上乃舍  
其職名別立稱謂至形於丹青著爲贊頌互相標榜欲何爲哉  
昔漢武帝爲戾太子立博望以通賓客從其所好司馬氏猶謂  
正直難親諂諛易合此固中人之常情宜太子之不終也夫太  
子國之儲貳國乃其國君父爲之立苑通賓客謹微之君子猶

以爲非况太宗乃藩王功高望重處危疑之地而可使之日夜聚徒黨乎在太宗非遵養之道在高祖非教子之法而亦非所以安儲位定國家也其後建成兄弟互相傾奪太宗幾危而所以爲太宗設謀効力以成其基業者皆天策府中之人遂至推刃同氣喋血禁庭以貽百世之譏太宗爲三代以後之令主而不免有慙德亦或以此哉

此論亦正但太宗有取天下之功有平天下之才非可與繼統者並論也

唐遣趙郡王孝恭李靖伐梁梁主銑降

唐發巴蜀兵以趙郡王孝恭李靖統之自夔州東擊潯陽孝恭帥戰艦二千餘時峽江方漲諸將俟請水落李靖曰兵貴神速今吾乘江漲掩其不備此必成擒不可失也孝恭乃帥戰艦二千餘艘銑果不爲備孝恭等拔其荆門宜都二鎮進至夷陵銑將文士弘

將精兵數萬屯清江癸巳孝恭擊走之進入北江銑江州總管蓋彥舉以五州來降銑以罷兵營農宿衛纔數千人聞唐兵至倉猝徵兵未集乃悉見兵出拒戰孝恭擊之而敗銑衆委舟收掠軍資靖見其衆亂縱兵奮擊大破之乘勝直抵江陵入其外郭又攻水城拔之銑交州刺史丘和長史高士廉司馬杜之松將朝江陵聞銑敗悉請孝恭降孝恭勒兵圍江陵內外阻絕問策於岑文本岑文本勸銑降乙巳銑詣軍降孝恭入據其城諸將欲大掠文本說孝恭曰江南之民遭隋虐政重以戰爭跋踵延頸以望真主是以蕭氏君臣決計歸命庶幾有所息肩今若縱兵俘掠士民失望恐自此已南無復向化之心矣孝恭稱善遽禁止之於是城中安堵秋毫無犯南方州縣聞之皆望風欵附孝恭送銑於長安唐主數之

銑曰隋失其鹿天下共逐之銑無天命故至此若以爲罪無所逃死竟斬於都市詔以孝恭爲荊州總管靖爲上柱國安撫嶺南先是銑遣劉洎略地嶺表得五十餘城未遷而銑敗洎以所得城來降靖旣度嶺所至皆下銑桂州總管李襲志來帥所部來降以靖代之引兵下九十六州得戶六十餘萬

范氏曰蕭銑故梁子孫因隋之亂保據荆土欲復先業非唐之叛臣也唐師伐之銑又以百姓之故不忍固守而降然則唐初割據之主銑最無罪高祖誅之淫刑甚矣

胡氏曰蕭銑志復舊業非唐叛臣唐若以文告之辭招而撫之再三不下然後用兵旣服其人當矜其志胙以江南百里之國使奉梁祀則唐之德庶幾乎武王下車之政矣而以盜賊待之

必殺之而後慊不仁甚矣

十一月唐杜伏威擊李子通執送長安

劉黑闥取唐定州總管李玄通死之高開道叛唐自稱燕王

十二月唐命秦王世民齊王元吉擊劉黑闥

初劉黑闥旣破淮安王神通移書趙魏竇建德故將卒爭殺唐長吏以應之李世勣走保洛州黑闥追擊破之拔相黎衛州半歲之間盡復建德舊境遣使北連突厥將軍秦武通程名振等皆自河

北遁歸長安乃命秦王世民齊王元吉討之

壬午

唐武德五

春正月劉黑闥自稱漢東王二月唐秦王世民破劉黑闥

於洛水黑闥奔突厥

正月庚寅東鹽州治中王才藝殺刺史田華以城應劉黑闥秦王

世民軍至獲嘉劉黑闥棄相州退保洛州丙申世民復取相州進軍肥鄉列營洛水之上以逼之幽州總管李藝將所部兵數萬會秦王世民討劉黑闥聞之留兵萬人使范願守洛州自將兵拒藝夜宿沙河程名振載鼓六十具於城西二里隄上急擊之城內地皆震動范願驚懼馳告黑闥黑闥遽遣其弟十善與行臺張君立將兵一萬擊藝於鼓城壬子戰於徐河十善君立大敗所亡八千人洛水人李去感據城來降秦王世民遣彭公王君廓將千五百騎赴之入城共守二月劉黑闥引兵還攻洛水癸亥行至列人秦王世民使秦叔寶邀擊破之己巳秦王世民復取邢州辛未并州人馮伯讓以城來降丙子李藝取劉黑闥定樂庶趙四州獲黑闥尚書劉希道引兵與秦王世民會洛州劉黑闥攻洛水甚急城四旁皆有水廣五十餘步黑闥於城東北築二甬道以攻之世民二引兵救之黑闥拒之不得進世民恐王君廓不能守召諸將謀之李世勣曰若甬道達城下城必不守行軍總管郊勇公羅士信請代君廓守之世民乃登城西南高家以旗招君廓君廓帥其徒力戰潰圍而出士信率左右二百人乘之入城代君廓固守黑闥晝夜急攻會大雪救兵不得往凡八日丁丑城陷黑闥素聞其勇欲生之士信詞色不屈乃殺之時年二十辛巳秦王世民拔洛水三月世民與李藝營於洛水之南分兵屯水北黑闥素挑戰世民堅壁不應別遣奇兵斷其糧道壬辰黑闥以高雅賢爲左僕射軍中高會李世勣引兵逼其營雅賢乘醉單騎逐之世勣部將潘毛刺之墜馬左右繼至扶歸未至營而卒甲午諸將復往逼其營

潘毛爲王小胡所擒黑闥運糧於冀州滄瀛諸州水陸俱進程名振以千餘人邀之沉其舟焚其車秦王世民與劉黑闥相持六十餘日黑闥潛師襲李世勣營世民引兵掩其後以救之爲黑闥所圍尉遲敬德帥壯士犯圍而入世民與略陽公道宗乘之得出道宗唐主從子也世民度黑闥糧盡必來決戰乃使人堰洛水上流謂守吏曰待我與賊戰乃決之丁未黑闥帥步騎二萬南度洛水壓唐營而陳世民自將精騎擊其精兵破之乘勝蹂其步兵黑闥帥衆殊死戰自午至昏戰數合黑闥力不能支王小胡謂黑闥曰智力盡矣宜早亡奔遂與黑闥先遁餘衆不知猶格戰守吏決堰洛水大至深丈餘黑闥衆大潰斬首萬餘級溺死數千人黑闥與范願等二百騎奔突厥山東悉平秦王世民自河北引兵將擊圓朗會唐主召之使馳傳入朝乃以兵屬齊王元吉庚申世民至長安唐主迎之於長樂世民具陳取圓朗形勢唐主復遣之詣黎陽大會軍趨濟陰丙子行臺民部尚書史萬寶攻徐圓朗陳州拔之夏六月劉黑闥引突厥寇山東又寇定州

秋七月唐秦王世民擊徐圓朗杜伏威入朝於唐

秦王擊圓朗下十餘城聲震淮泗杜伏威懼請入朝秋七月甲申秦王世民以淮濟之間略定使淮安王神通行軍總管任瓌李世勣攻圓朗乙酉班師

李子通叛唐伏誅

李子通謂樂伯通曰伏威旣來江東未定往收舊兵大功可立遂相與亡走至藍田爲吏所獲

庖言曰唐初僭國爲主如李密朱粲高開道李子通輩皆據土失衆歸降唐者唐釋不誅而復爵之可謂厚矣而尋復叛亂德於何有然則薛仁果王世充竇建德蕭銑之誅亦有所不得已也  
隋漢陽太守馮盎降唐

隋漢陽太守馮盎承李靖檄以所部降唐以其地爲高羅春白崖儋林振八州以盎爲總管

八月突厥寇并州唐遣鄭元璠如師頡利引還

冬十月唐遣齊王元吉擊劉黑闥淮陽王道玄與黑闥戰敗沒

淮陽王道玄將兵二萬擊劉黑闥與副將史萬寶不協道玄輕騎先出犯陳萬寶擁兵不進由是敗沒秦王深惜之曰道玄嘗從吾征伐見吾深入賊陳心慕効之以至於此爲之流涕世民自起兵

以來前後數十戰常身先士輕騎深入雖屢犯危殆而未嘗爲矢刃所傷

尹氏曰前書命秦齊二王擊黑闥繼書秦王破黑闥則成功者秦王也至此上書遣元吉而下書道玄敗沒則元吉受任爲無功矣唐祖是時蓋默忌秦王功高而猶幸餘子有功足以敵之初不料元吉之不能勝其任也觀者以是察之知書法之意矣  
十二月唐遣太子建成擊劉黑闥

道玄之敗也山東震駭黑闥盡復故地進據洛州元吉不敢進而太子建成請行故遣之初唐王之起兵晉陽也皆秦王世民之謀唐主謂世民曰若事成則天下皆汝所致當以汝爲太子世民拜且辭及唐主爲唐王將佐亦請以世民爲太子唐主將立之世民



固辭而止唐主卽位乃立長子建成爲皇太子世民爲秦王元吉爲齊王武德五年冬十一月太子建成性寬簡喜酒色遊畋齊王元吉多過失皆無寵於唐主世民功名日盛唐主常有以代建成建成內不自安乃與齊王元吉協謀共傾世民各引樹黨友唐主晚年多內寵小王且二十人其母競交結諸長子以自衛建成與元吉曲意事諸妃嬪諂諛賂遺無所不至以求媚于上或言蒸於張婕妤尹德妃宮禁深秘莫能明也秦王世民獨不奉事諸妃嬪諸妃嬪爭譽建成元吉而短秦王是時東宮諸王公妃主之家及後宮親戚橫長安中恣爲非法有司不敢詰秦王居承乾殿元吉居武德殿後院與上臺東宮晝夜通行無復禁限太子二王出入上臺皆乘駿馬携弓刀雜物相遇如家人禮太子令秦齊王教

與詔赦並行有司莫知所從唯據得之先後爲定

使唐之政終於如此亡隋之續

耳秦王平洛陽唐主使貴妃等數人詣洛陽選閱隋宮人及收府

庫珍物貴妃等私從秦王求寶及爲親屬求官秦王曰寶貨皆已

籍奏官當授賢才有功者皆不許由是益怨秦王以淮安王神通

有功給田數十頃張婕妤之父因婕妤求之於唐主唐主手敕賜

之神通以教給在先不與婕妤訴於唐主曰敕賜妾父田秦王奪

之以與神通唐主遂發怒責世民曰我手敕不如汝教耶它日謂

左僕射裴寂曰此兒又典兵在外爲書生所教非復昔日子也

胡氏

曰太子令二王教與詔赦並行雖高祖隆愛諸子之失太宗獨不知其不可而辭之耶房杜諸人亦無所警發何也高祖不思因事更制乃謂秦王爲書生所教可謂易其言矣尹德妃父阿鼠驕橫秦王府屬杜如晦過

其門阿鼠家僮數人曳如晦墜馬毆之折一指曰汝何人敢過我

門而不下馬阿鼠恐秦王訴於唐主先使德妃奏云秦王左右陵  
暴妾家唐主復怒責秦王曰我妃嬪家猶爲汝左右所陵况小民  
乎秦王深自辨折唐主終不信秦王每侍宴宮中對諸嬪妃思太  
穆皇后早終不得見上有天下或歔歔流涕唐主顧之不樂諸妃  
嬪因密共譖世民曰海內幸無事陛下春秋高惟宜相娛樂而秦  
王獨涕泣正是憎疾妾等陛下萬歲後妾母子必不爲秦王所容  
無子遺矣因相與泣且曰皇太子仁孝陛下以妾母子屬之必能  
保全唐主爲之愴然由是無易太子意待秦王寢踈而建成元吉  
日親矣時唐主遣齊王元吉擊劉黑闥淮陽王道玄與黑闥戰敗  
沒山東震駭黑闥盡復故地進據洛州齊王元吉不敢進太子中  
允王珪洗馬魏徵說太子曰秦王功高天下中外歸心殿下但以  
年長位居東宮無大功以鎮服海內今劉黑闥散亡之餘衆不滿  
萬資糧匱乏以大軍臨之勢如拉朽殿下宜自擊之以取功名因  
結納山東豪傑庶可自安太子乃請行於唐主唐主許之十一月  
甲申詔太子將兵討黑闥

范氏曰立子以長不以功以德不以衆古之道也晉獻公使申  
生伐東山里克入而諫君出而勉太子以孝君子曰善處父子  
之間矣王魏輔導東宮當勸建成以孝友則儲位安矣秦王有  
定天下之功高祖欲立之能爲太伯不亦善乎乃使建成擊賊  
以立威結豪傑以自助是導之以爭也禍亂從此息乎以王魏  
之賢猶如此况庸人哉

胡氏曰人之大倫有常有變若王魏能勸建成如東海王彊力

請而去則父子君臣之間變而不失其正矣

尹氏曰昔晉獻公使太子申生伐東山里克諫曰太子奉冢嗣不可以帥師獻公不從而申生亦卒不免今建成已正儲極胡爲復使之擊賊是舉非但王魏失謀蓋亦出于高祖之意將使建成立功以敵秦王耳夫太子本以嫡長次序而立豈論有功與否正使殄平黑闥其功亦豈能敵秦王之一二此則胥失者也夫晉獻公欲踈其子故使之將兵而唐祖欲私其子乃使之擊賊雖所見不同皆私蔽之是固二君之過也

十二月魏州總管田留安擊劉黑闥破之

劉黑闥擁兵而南河北州縣皆附之惟魏州總管田留安不下黑闥攻之留安奮擊破之獲其將孟柱降六千人

太子建成兵至昌樂劉黑闥亡走

建成元吉兵至昌樂黑闥引兵拒之再陣皆不戰魏徵謂太子曰前破黑闥將帥皆懸名處死故齊王之來雖有詔赦其黨莫信今宜悉解其囚慰遣之可坐視其離散矣太子從之黑闥食盡衆多亡降黑闥遂與數百騎遁去

癸未

唐武德六

春正月漢東將諸葛德威執其君黑闥降唐唐斬之

時太子建成遣騎將劉弘基追黑闥黑闥奔走不得息至饒陽從者纔百餘人餒甚黑闥所署刺史諸葛德威出迎饋之食未畢勒兵執之送詣太子斬於洛州

二月徐圓朗走死其地皆入于唐

三月梁將賀遂索同以十二州降唐

前洪州總管張善安反

秋八月唐淮南道行臺僕射輔公柝反

初杜伏威入朝留輔公柝守丹陽令王雄誕典兵爲之副公柝詐  
雄誕奪其兵諭以反計雄誕不從公柝殺之遂稱帝於丹陽國號  
宋詔趙郡王孝恭李靖討之

冬十月置屯田於并州

突厥數爲邊患并州長史竇靜表請於太原置屯田以省餽運議  
不合靜切論不已徵靜入朝與裴寂議於唐主前寂等不能屈乃  
從靜議歲收數千斛秦王復請增置屯田於并州從之

十二月唐安撫使李大亮討張善安執之

初輔公柝反與張善安連兵黃州總管周法明將兵擊公柝善安

遣刺客殺之至是大亮擊善安於洪州隔水而陳諭以禍福因單  
騎入其陳執手共語善安大悅遂許降旣而善安詣大亮營大亮  
執之送至長安赦其罪及公柝敗得所與往還書乃殺之

唐高祖神堯皇帝武德七年甲申春二月高開道爲其下所殺

是歲高開道輔公柝皆敗死唯梁師都至貞觀二年乃亡綱目至  
是始以大統紀年

二月趙郡王孝恭克丹陽斬輔公柝

先是輔公柝遣其將馮慧亮等帥舟師陳平通等將步騎拒官軍  
孝恭與李靖帥舟師次舒州李世勣帥步卒渡淮次陝石慧亮等  
堅壁不戰皆曰慧亮據險兵強不可猝拔不如直指丹陽掩其巢  
穴靖曰公柝保據石頭兵亦不少豈易取哉進攻不下慧亮等躡

吾後腹背受敵此危道也不如攻其城以挑之一舉可破也孝恭  
然之使羸兵攻賊壘而勒精兵結陳以待之攻壘者不勝而走賊  
出兵追之遇大軍與戰大敗乘勝逐北兩戍皆潰公祐棄城走人  
執送丹陽梟首江南皆平

卮言曰隋末僭國偽王於是盡矣惟梁師都至貞觀二年乃亡  
然朔方一郡不足數也故綱目於是年始以大統歸唐而秦涼  
鄭夏吳楚定楊漢東魯郡皆太宗自將平之盛矣哉太宗之烈  
也

學海君道部卷之一百三十六

創業類四

帝王開基四

大業篇九

太宗平內難章

武德七年甲夏六月慶州都督楊文幹反遣秦王世民討平之

初齊王元吉勸太子建成除秦王世民曰當爲兄手刃之秦王從

上幸元吉第元吉伏護軍宇文寶於寢內欲刺秦王建成性頗仁

厚遽止之元吉愠曰爲兄計耳於我何有建成擅募長安及四方

驍勇二千餘人爲東宮衛士分屯左右長林號長林兵

東宮有左右長林門

又密使右虞侯率可達志從燕王李藝發幽州突騎三百置東宮

諸坊欲以補東宮長上爲人所告上召建成責之流可達志於雋州楊文幹嘗宿衛東宮建成與之親厚私使募壯士送長安上將幸仁智宮命建成居守秦王與元吉皆從建成使元吉就圖秦王曰安危之計決在今歲又使郎將爾朱煥校尉橋公山以甲遺文幹二人至豳州上變告太子使幹舉兵使表裏相應又有寧州人杜鳳舉亦詣官言狀上怒托他事手詔召建成令詣行在建成懼不敢赴太子舍人徐師暮勸之據城舉兵詹事主簿趙弘智勸之貶損車服屏從者詣上謝罪建成乃詣仁智宮未至六十里悉留其官屬於毛鴻賓堡以十餘往見上叩頭謝罪奮身自擲幾至於絕上怒不改是夜置之幕下飼以麥飯使殿中監陳福防守遣司農卿宇文穎馳召文幹穎至慶州以情古之文幹遂舉兵反上遣

左武衛將軍錢九隴與靈州都督楊師道擊之甲子上詔秦王世民謀之秦王曰文幹豎子敢爲狂逆計府僚已應擒戮若不爾正應遣一將討之耳上曰不然文幹事連建成恐應之者衆汝宜自行還立汝爲太子吾不能效隋文帝自誅其子當封建成爲蜀王蜀兵脆弱他日苟能事汝汝宜全之不能事汝取之易耳上以仁智宮在山中恐盜兵猝發夜帥宿衛南出山外行數十里東宮官屬繼至皆令三十人爲隊分兵圍守之明日復還仁智宮秦王旣行元吉與妃嬪更迭爲建成請封德彝復爲之營解於外上意遂變復遣建成還京師惟責以兄弟不睦歸罪於王珪與左衛率韋挺天策參軍杜淹並流於嶺州秋七月秦王軍至寧州其黨皆潰癸酉文幹爲其麾下所殺傳首京師獲文穎誅之

范氏曰建成善募甲兵以危君父其罪大矣高祖不以公義廢之乃惑於姦臣之計牽於妃嬪之請至使兄弟不相容於天下皆高祖不明之過也

尹氏曰楊文幹之反事連建成綱目書之分注載之高祖是時若能按其罪而黜之則無他日兄弟相殘之禍矣惜哉

秋閏七月突厥入寇遣秦王世民將兵禦之八月突厥受盟而還突厥寇并州上議棄長安徙都樊鄧太子建成齊王元吉皆贊成其策秦王諫曰臣請係諷利之首致於闕下若其不效遷都未晚上乃止建成與妃嬪因共譖秦王曰突厥雖屢爲邊患得賂卽退秦王外托禦寇之名內欲總兵權成其篡奪之謀耳上校獵城南太子秦齊王皆從上命二子馳射角勝建成有胡馬肥壯而喜蹶

以授秦王曰此馬甚駿能超數澗弟善騎試乘之秦王乘以逐鹿馬蹶秦王躍立於數步之外馬起復乘之如是者三顧謂宇文士及曰彼欲以此見殺死生有命庸何傷乎建成聞之因令妃嬪譖之於上曰秦王自言我有天命方爲天下主豈有浪死上大怒先召建成元吉然後召秦王入責之曰天子自有天命非智力可民汝求之一何急耶秦王免冠頓首請下法司案驗上怒不改會有司奏突厥入寇上乃改容勞勉秦王命之冠帶與謀突厥閏月巳未詔世民元吉將兵出幽州以禦突厥上餞之於蘭池上每有寇盜輒命秦王討之事平之後猜嫌益甚八月諷利突利二可汗舉國入寇連營南上世民引兵拒之遣人說突利突利乃請和親世民許之突利因自託於世民請爲兄弟世民亦以恩意撫之

與盟而去

九年丙戌夏六月太白經天秦王世民殺太子建成齊王元吉立世民為皇太子

秦王世民既與太子建成齊王元吉有隙以洛陽形勝之地恐一朝有變欲出保之乃以行臺工部尚書温太雅鎮洛陽遣秦府車騎將軍張亮將左右王保千餘人之洛陽陰結山東豪傑以俟變多出金帛以恣其用元吉告亮謀不軌下吏考驗亮終無言乃釋之使還洛陽太子夜召秦王飲酒而醜之秦王暴心痛吐血數升淮安王神通扶之還西宮上幸西宮問秦王疾敕建成曰秦王素不能飲自今無得復夜飲因謂秦王曰首建大謀削平海內皆汝之功吾欲立汝為嗣汝固辭且建成年長為嗣日久吾不忍奪也觀汝兄弟似不相容同處京邑必有紛競當遣汝還行臺居洛陽

自陝以東皆主之秦王時領陝東道大行臺仍命汝建天子旌旗如漢梁孝王

故事秦王涕泣辭以不欲遠離膝下上曰天子一家東西兩都道路甚邇吾思汝即往毋煩悲也將行建成元吉相與謀曰秦王若至洛陽有土地甲兵不可復制不如留之長安則一匹夫耳取之易矣乃密令數人上封事言秦王左右聞往洛陽無不喜躍觀其志趣恐不復來又遣近幸之臣以利害說上上意遂移事復中止建成元吉與後宮日夜譖訴秦王於上上信之將罪秦王陳叔達諫曰秦主有大功於天下不可黜也且性剛烈若加挫抑恐不勝憂憤或有不測之疾陛下悔之何及上乃止元吉請殺秦王上曰彼有定天下之功罪狀未著何以為辭元吉曰秦王初平東都顧望不還散錢帛以樹私恩又違敕命非反而何但應速殺何患無



辭上不應秦府僚屬皆憂懼不知所出行臺考功郎中房玄齡謂比部郎中長孫無忌曰今嫌隙已成一旦禍機竊發豈惟府朝塗

地

府朝猶言府廷也漢時郡僚謂本郡為朝郡亦此類

乃實社稷之憂莫若勸王行周公之

事以安社稷存亡之機間不容髮正在今日無忌曰吾懷此久矣不敢發口今吾子所言正合吾心謹當白之乃入言秦王秦王召玄齡謀之玄齡曰大王功蓋天地當承大業今日憂危乃天贊也願大王勿疑乃與府屬杜如晦共勸秦王誅建成元吉建成元吉以秦府多驍將欲誘之使為己用密以金銀器一車贈左二副護軍尉遲敬德并以書招之敬德辭建成怒遂與之絕元吉使人刺之不得乃譖敬德於上下詔獄訊治將殺之秦王固請得免又譖左一馬軍總管程知節出為康州刺史知節謂秦王曰大王股肱

羽翼盡矣身何能久知節以死不及願早決計又以金帛誘右二護軍段志玄志玄不從建成謂元吉曰秦府智畧之士可憚者獨房玄齡杜如晦耳皆譖之於上而逐之秦王心腹惟長孫無忌尚在府中與其舅雍州治中高士廉右疾車騎將軍侯君集及尉遲敬德等日夜勸秦王誅建成元吉秦王猶豫未決問於李靖靖辭問於李世勣世勣辭秦王由是重二人會突厥郁射設將數萬騎屯河南入塞圍烏城建成薦元吉代秦王督諸軍北征上從之命元吉督李藝張瑾等救烏城元吉請尉遲敬德程志節段志玄等與之偕行簡閱秦王帳下精銳之士以益元吉軍率更丞王暉密告秦王曰太子語齊王今汝得秦王驍將精兵擁數萬之衆吾與秦王餞汝於昆明池使壯士拉殺之於幕下奏云暴卒主上宜無

不信考異曰舊傳以為建成實有此言而昨告之按建成前醜秦王高祖以知之今若明使壯士拉殺而欺云暴卒高祖豈肯信之理此說殆同兒戲今但云嗔告建成等則事之虛實皆未可知所謂疑以傳疑也吾當使人進說令授

吾國事敬德等既入汝手宜悉坑之孰敢不復秦王以嗔言告長孫無忌等無忌等勸秦王先事圖之秦王歎曰骨肉相殘古今大惡吾誠知禍在朝夕欲俟其發然後以義討之亦不可乎敬德曰人情誰不愛其死今眾人以死奉王乃天授也禍機垂發而王猶晏然不以為憂大王縱自輕如宗廟社稷何大王不用敬德之言敬德將竄身草澤不能留居大王左右交手受戮也無忌曰不從敬德之言事今敗矣敬德等必不為王有無忌亦當相隨而去不能復事大王矣秦王曰吾所言亦未可全棄公更圖之敬德曰王今處事有疑非智也臨難不決非勇也且大王素所蓄養勇士八百餘人在外者今已入宮授甲執兵事勢已成大王安得已乎秦王訪之府僚皆曰齊王凶戾終不肯事其兄比聞護軍薛實嘗謂齊王曰王之名合之成唐字大王終主唐祀齊王喜曰但除秦王取東宮如反掌耳彼與太子謀亂未成已有取太子之心亂心無厭何所不為若使二人得志恐天下非復唐有以大王之賢取二人如拾地芥耳奈何徇匹夫之節忘社稷之計乎秦王猶未決眾曰大王以舜為何如人曰聖人也眾曰使舜浚井不出則為井中之泥塗廩不下則為廩上之灰安能澤被天下法施後世乎是以小杖則受大杖則走蓋所存者大故也秦王命卜之幕僚張公謹自外來取龜投地曰卜以決疑今事在不疑尚何卜乎卜而不吉容得已乎於是定計秦王令無忌密令房玄齡等曰敕旨不聽復

百餘人在外者今已入宮授甲執兵事勢已成大王安得已乎秦王訪之府僚皆曰齊王凶戾終不肯事其兄比聞護軍薛實嘗謂齊王曰王之名合之成唐字大王終主唐祀齊王喜曰但除秦王取東宮如反掌耳彼與太子謀亂未成已有取太子之心亂心無厭何所不為若使二人得志恐天下非復唐有以大王之賢取二人如拾地芥耳奈何徇匹夫之節忘社稷之計乎秦王猶未決眾曰大王以舜為何如人曰聖人也眾曰使舜浚井不出則為井中之泥塗廩不下則為廩上之灰安能澤被天下法施後世乎是以小杖則受大杖則走蓋所存者大故也秦王命卜之幕僚張公謹自外來取龜投地曰卜以決疑今事在不疑尚何卜乎卜而不吉容得已乎於是定計秦王令無忌密令房玄齡等曰敕旨不聽復

事王今若私謁必坐死不敢奉教秦王怒謂敬德曰玄齡如晦豈  
叛我耶取所佩刀授敬德曰公往觀之若無來心可斷其首以來  
敬德往與無忌共諭之曰王已決計公宜速入共謀之吾屬四人  
不可羣行道中乃令玄齡如晦著道士服與無忌俱入敬德自它  
道亦至己未太白復經天傳奕密奏太白見秦分秦王當有天下  
上以其狀受秦王於是秦王密奏建成元吉淫亂後宮且曰臣於  
兄弟無絲毫負今欲殺臣似爲世充建德報讎臣今枉死永違君  
親魂歸地下實耻見諸賊上省之愕然報曰明當鞠問汝宜早參  
庚申秦王帥長孫無忌等入伏兵於玄武門張婕妤竊知秦王表  
意馳語建成建成召元吉謀之元吉曰宜勒宮府兵託疾不朝以  
觀形勢建成曰兵備已嚴當與弟入參自問消息乃俱入趣玄武

門上時已召裴寂蕭瑀陳叔達等欲按其事建成元吉至臨湖殿  
與裴寂跋馬東歸宮府秦王從而呼之元吉張弓射秦王再三不  
發秦王射建成殺之尉遲敬德將七十騎繼至左右射元吉墜馬  
秦王馬逸入林下爲木枝所絙墜不能起元吉遽至奪弓將扼之  
敬德躍馬叱之元吉步欲趣武德殿敬德追射殺之翊衛車騎將  
軍馮翊馮翊聞建成死嘆曰豈有生受其恩而死迺其難乎乃與  
副護軍薛萬徹屈咥直府左車騎萬年謝叔方帥東宮齊府精兵  
二千馳趣玄武門張公謹多力獨閉關以拒之不得入雲麾將軍  
敬君弘掌宿衛兵屯玄武門挺身出戰所親止之曰事未可知且  
徐觀變俟兵集成列而戰未晚也君弘不從與中郎將呂世衡大  
呼而進皆死之君弘顯雋之曾孫也守門兵與萬徹等力戰良久

萬徹鼓譟欲攻秦府將士大懼尉遲敬德持建成元吉首示之宮  
在兵遂潰萬徹與數十騎亡入終南山馮翊旣殺敬君弘謂其徒  
曰亦足以少報太子矣遂解兵逃於野上方泛舟海池秦王使尉  
遲敬德入宿衛敬德環甲持矛直至上所上大驚問曰今日亂者  
誰耶卿來此何爲對曰秦王以太子齊王作亂以兵誅之恐驚動  
陛下遣臣宿衛上謂裴寂等曰不圖今日乃見此事當如之何蕭  
瑀陳叔達曰建成元吉本不預義謀又無功於天下疾秦王功高  
望重共爲姦謀今秦王以討而誅之秦王功蓋宇宙率土歸心陛  
下若處以元良委之國事無復事矣上曰善此吾之夙心也時宿  
衛及秦府兵與二宮左右戰猶未已敬德請降手敕令諸軍並受  
秦王處分上從之天策府司馬宇文士及自東上閣門出宣敕衆

後定上又使黃門侍郎裴矩至東宮曉諭諸將卒皆罷散上乃  
召秦王撫之曰近日以來幾有投杼之感秦王跪而吮上乳號慟  
久之建成子安陸王承道河東王承德武安王承訓汝南王承明  
鉅鹿王承義元吉子梁郡王承業漁陽王承鸞普安王承獎江夏  
王承裕義陽王承度皆坐誅仍絕屬籍初建成許元吉以正位之  
後立爲大弟故元吉爲之盡死諸將欲盡誅建成元吉左右百餘  
人籍沒其家尉遲敬德固爭曰罪在二凶旣伏其誅若及支黨非  
所以求安也乃止是日下詔赦天下凶逆之罪止於建成元吉自  
餘黨與一無所問其僧尼道士女冠並宜依舊國家庶事皆取秦  
王分處辛酉馮立謝叔方皆自出薛萬徹亡匿秦王屢使諭之乃  
出秦王曰此皆忠於所事義士也釋之癸亥立秦王爲皇太子又

詔自今軍國庶事無大小悉委太子處決然後聞奏  
司馬公曰立嫡以長禮之正也然高祖所以有天下者太宗之  
功隱太子以庸劣居其右地嫌勢逼必不相容鄉使高祖有文  
王之明隱太子有泰伯之賢太宗有子臧之節則亂何自而生  
矣既不能然太宗始欲俟其先發然後應之如此則事非獲已  
猶爲愈也既而爲群下所迫遂至喋血禁門推刃同氣貽譏千  
古惜哉夫創業垂統之君子孫之所儀刑也彼中明肅代之傳  
繼得非有所指擬以爲口實乎

范氏曰建成雖無功太子也太宗雖有功藩王也太子君之貳  
父之統也而殺之是無君父也立子以長不以功所以重先君  
之世也故周公不有天下弟雖齊聖不先於先父矣或以太宗  
殺建成元吉比周公誅管蔡者亦非也昔象日以殺舜爲事而  
舜封之管蔡啓商以叛周而周公誅之其迹不同其道一也蓋  
象得罪於舜而已固封之管蔡將危周公以間王室得罪於天  
下故誅之非周公誅之天下所當誅也後世王者不幸有弟如  
象則當如舜封之是也不幸而有兄如管蔡則當如周公誅之  
是也舜處其常周公處其變此聖所以同歸于道也夫建成元  
吉非得罪于天下者也則殺之者已之私耳豈周公之心乎或  
曰使建成爲天子輔以元吉則唐必亡矣奈何曰古之賢人守  
死而不爲不義者義重於死故也必若悖天理滅人倫而有天  
下不若亡之愈也故爲唐史者書曰秦王世民殺皇太子建成  
齊王元吉立世民爲皇太子然則太宗之罪著矣

朱子曰太宗功高天下所係屬亦自無安頓處只高祖不善處  
置了又建成乃欲立功蓋之如玄宗誅韋氏有功睿宗欲立宋  
王成器成器便理會得事堅不受

慈溪黃氏曰造唐者太宗也天下既定雖高宗且當退爲天子  
之父奈何又欲授無賴之建成乎使開創之初人彘泯絕終唐  
之世亂臣賊子接踵而不可救者雖太宗慚德居多在高祖亦  
有當審處者

丘氏濬曰綱目從唐史書世民殺太子建成金氏會編書世民  
弒太子建成何蓋世民於建成以家言則兄也以國言則儲君  
也名分已定書之以弒彼又何辭然則爲太宗計奈何觀高祖  
謂太宗曰首建大謀削平海內皆汝之功吾欲立女爲嗣而汝

固辭則高祖本意固欲立太宗也太宗於此真心推讓退處藩  
服是固無得而議矣若不能然揣之於已勢有不容已量之於  
人力有所不足則承高祖之命而不爲虛讓怡然居之則彼雖  
有辭而吾得以父命爲據矣不知出此而虛辭飾貌以相容懷  
機蓄智以相待一旦事勢所迫遂至蹀血禁庭推刃同氣以貽  
千古之譏其爲太宗累也大矣或曰溫公謂太宗始欲俟其先  
發而後應之如此則事非獲已猶爲愈也嗚呼應之之言豈所  
以施於骨肉手足之親哉若夫元吉陰與建成謀害太宗幸其  
事成而復圖之則是元吉非但得罪於太宗乃得罪於唐之宗  
社也非但太宗之罪人亦建成之罪人也其罪蓋不容誅矣故  
舊史書殺而此加以誅

謝氏曰世儒譏唐太宗蹠血禁門爲不臣不弟以春秋之法責之誠不得不爲法受惡矣詳攷群史太宗實無奪嫡之心而天命素定由于高祖處之未得其宜也孟子曰五百年必有王者興漢之光武應昌期之王者也自光武而至太宗六百餘年中經陽九百六之厄正否極將泰之時龍鳳之姿天日之表非天實命之以爲億兆之君師乎晉陽伐罪弔民蓋出太宗之略而非高祖本心徵諸天下皆汝所致化家爲國由汝之語可見也武德以來李密化及薛舉世充劉武周竇建德群雄各帝一方兵強地廣出師太宗每勝而建成元吉每敗然則天下實太宗之天下而子有天下尊歸于父父建儲宮宜在太宗而不得循立子以長之常格明矣太宗率由子弟之道固辭儲位再三無

幾微見于言面高祖遂定建成爲太子以李綱輩補導之建成乃昵近小人聲色是耽嫉太宗功高而陰爲擠陷之圖高祖盍不思以天下與人易爲天下得人難朱均不肖堯舜尚揖遜于其臣况兄朱均而弟堯舜又取天下于群雄之手而尊崇于父父忍以億兆生民之命而付之不肖之子俾後人笑吾猶吾之笑隋文可乎周太王非不知泰伯之賢也因孫昌有聖瑞而遂立季歷以傳昌季歷原非創業之功也光武非不知東海之賢也因明帝福德過之而遂廢彊以立陽明帝亦無興王之力也自古賢聖之君選建明德無功而超伯立仲以爲社稷生民之計况天下本仲氏之所取惟以父之故而伯氏偃然據之匪惟天命之不順太王光武之不爲而亦普天臣民之所不與也太

帝王開基 卷一四  
宗甘守秦藩本無非望而黑闥方張河朔土崩不得已而奉命  
征之旋即元兇授首僭叛肅清建成復嫉之如仇凡可以讒謀  
戕害者百爲之計太白經天之奏方形傳奕之章而明當詢問  
之旨已成臨湖伏兵之慘禁廷之謀血出下人應兵之策而非  
夙有賊兄之心也太祖且柰之何哉使高祖于卽位之初明詔  
天下以秦王創業功高建爲儲震遵泰伯東海之條封建成以  
大國則友于之情篤讓恭之誼高爲天下得人之仁著而彝倫  
有攸叙之美四海仰風行之化矣惜高祖處之失其道而太宗  
應之流于忍耳太宗謂史官曰昔周公誅管蔡以安周季友醜  
叔牙以存魯朕之所處正類吁雖未必然而庶幾近之矣予故  
於此而深恨高祖思之不審見之不早而太宗計出無聊應之  
未仁處之未善亦所遭之不幸也

卮言曰唐太宗殺建成元吉後之說者有二一謂太宗有安天  
下之功建成忌而害之太宗殺之比於周公之誅管蔡一謂立  
子以長不以功建成當有天下而太宗殺之爲逆至金氏會編  
遂改舊史書殺建成爲弑殺元吉爲誅丘氏取之愚謂不然弑  
之爲言施於君父者也春秋書里克弑其君之子奚齊傳曰喪  
未踰年不成爲君也今建成非君也安得書弑誅之爲言施於  
顯惡者也春秋無此義惟綱目有之用之亂臣賊子今元吉未  
反也安必書誅且以平時之名分而責於撥亂創業之主謬矣  
高祖之尊爲天子富有四海宗廟饗而子孫保者太宗爲之也  
方劉文靜謂太宗曰天下將亂非高光之才不能定也太宗曰



安知其無但人不識耳是時太宗固已高光自負矣太宗之才自足以取天下則天下者太宗有也以太宗言帝位當屬高祖以建成言帝位當屬太宗此不但論其征伐之功而已今夫庶人之子封殖家業以統于父父挈以與其兄兄且忌弟而欲害之豈人情乎當時建成元吉蓄謀已久讒間已行太宗非有子臧季札之節則必有申生佞夫之禍矣太宗艱難百戰取天下於羣盜之手坐視不肯兄弟擾之而已乃欲守死善道修匹夫之行此豈其初心哉至我朝立廟以祀前代帝王創業之主與焉至唐祀太宗而高祖不與則公論定矣范氏又曰太宗手刃建成盡殺其子爲忍爲薄啓後誅滅骨肉之端此言是也君子尚論當從其至者夫子以天下事殷爲文王之德孟子以致辟

管叔爲周公之過太宗德衰于文王而過大于周公曩令伯夷叔齊見之不知何以爲心也論者徒高太宗之功而諱其罪則後之罪浮於功者多矣先儒之論顧可少歟

以魏徵王珪爲諫議大夫  
初洗馬魏徵常勸建成早除秦王及建成敗太子召徵謂曰汝何爲離間我兄弟徵舉止自若對曰先太子早從徵言必無今日之禍太子改容禮之亦召王珪韋挺於雋州皆以爲諫議大夫  
范氏曰春秋書公伐齊納糾不稱子不當立者也齊小白入于齊以小白繫之齊當入者也是以管仲不得讐桓而得以之爲君建成爲太子且兄也秦王爲藩王又弟也王魏受命爲東宮之臣則建成其君也豈有人殺其君而可以北面爲之臣乎

尹氏曰太宗之德以納諫爲首稱今觀聽政之初卽擢王魏爲諫臣綱目亦首書於冊則其盛德固已具見於此宜其有致治太平之功也雖然太宗從諫之美固可嘉矣王魏事讐之失亦可聞乎今觀先儒辨論太子藩王之分深責王魏不能死於其難反覆思之竊有疑焉夫臣之事君固當終始一節若君臣之分未定遽死於其難則亦君子之所不與彼王珪爲太子中允魏徵爲太子洗馬是果誰之命耶若出於太子之命則太子其君也若出於高祖則高祖乃其君耳大抵東宮官屬與諸王官屬皆出於朝廷所擢或今日爲此明日爲彼或身處朝列兼職官僚初無定選與人臣事君不同非如齊桓子糾昔後周高祖謂其弟齊公憲侍讀裴文矩曰卿雖陪侍齊公不得遽同爲臣欲死於所事斯言得之矣彼齊桓子糾若敵國然各君其君各臣其臣非若唐高祖在上制命出於一人者也然則王魏非惟不能讐太宗亦不當讐太宗其失在於不能請命高祖而已綱目於王魏之事書之初無貶詞而具載范公祖禹之言於下以待後人折衷之耳使綱目果罪二子則當書曰以故太子洗馬魏徵中允王珪爲諫議大夫矣斯事繫臣子之大節所當別曰不得不詳而辨之

卮言曰唐之基業前後皆太宗所造也高祖得而享之建成不得而承之當時嫌隙已構非太宗殺建成則建成殺太宗也使建成而殺太宗後世更有餘恨矣况真主不死建成必自斃也王魏第東宮官屬耳高祖未嘗托孤寄命建成未嘗分闡授鉞

也建成死而君父自在何以死哉故魏徵爲太子忠謀則可爲太子死難則不可建成存而讐太宗則可建成亡而讐太宗則不可太宗釋舊怨而不校又置以爲諫議恢乎君人之度哉范氏歷詆唐事其說近刻尹氏之論當矣

帝自稱太上皇

六月壬申上以手詔賜司空裴寂等曰朕當加尊號爲太上皇有司擇日宜速奏聞

廬江王瑗反幽州將軍王君廓殺之

廬江王瑗爲幽州都督建成謀害秦王密與瑗相結建成死詔遣使召瑗瑗心不自安謀于將軍王君廓君廓欲取瑗以爲功乃曰大王若入必無全理瑗乃發驛徵兵君廓因帥衆執瑗縊之詔以君廓爲幽州都督以瑗家口賜之

七月遣魏徵宣慰山東

建成元吉之黨亡在民間雖更赦令猶不自安徵幸者爭告捕以邀賞王珪以啓太子太子令事連東宮齊王及李瑗者並不得告反違者反坐遣魏徵宣慰山東聽以便宜從事徵至磁州遇州縣錮送前太子千牛李志安齊王護軍李思行等詣京師徵曰前宮齊府左右已赦不問今復送思行等誰不自疑遂皆解縱之太子聞之大喜

八月太子卽位

八月癸亥制傳位皇太子詔曰乾道統天文明于是御曆大寶曰位宸極所以居尊在昔勛華不傳昌厥緒揖遜之禮旁求歷試三

代之隆天下爲家繼體承基裔嗣相襲故能孝享宗廟立世長遠  
貽慶後昆克隆鼎祚朕膺期受命握圖闡極大拯橫流載寧區夏  
然而昧旦求衣日昃坐朝馭朽懷兢履冰在念憂勤庶政九載於  
此今英華已竭耄期倦勤久懷物表高蹈風雲釋累遺塵有同脫  
屣深求閒逸用保休和皇太子世民久叶祥符夙彰奇表天縱神  
武智韞極深雲雷締構霸業伊始義旗之舉首創成規京邑克平  
莫非其力及皇極已建天步猶艱內發謀猷外清氛祲英圖冠世  
妙筭如神伐暴除克無思不服薛舉負西戎之衆武周引北狄之  
兵蠭起蜂飛假名竊號元戎所指折首傾巢王世充藉府庫之資  
愚山河之固信臣精卒承間首險建德因之同惡相濟金鼓纔震  
一從兩擒師不踰時戎衣大定夷劉闡於趙魏覆徐朗於譙兗功

格穹蒼德孚宇宙雄才宏略振古莫儔追我大唐繫其是賴旣而  
居中作相任隆列辟百揆時總三階以平地屬元良實維國本萬  
邦咸正兆庶樂推畧律呈祥休徵允集華夏載佇謳頌知歸今傳  
皇帝位于世民所司備禮以時冊授公卿百官四方岳牧及長吏  
下至士民宜悉祇奉以稱朕意夫政惟通變禮貴從宜利在因民  
義存適要條章法度不便于時者隨意改易勿有疑滯昔漢祖撥  
亂身定大功群臣推奉光宅帝位而事父資敬五日一朝備禮尊  
崇號稱太上朕方游心恬淡安神玄默無爲拱揖憲章往古稱謂  
之宜一准漢代庶宗社之固申錫無疆天祿之期永安勿替布告  
天下咸使聞知太子冲讓不敢奉詔翌日朝于西宮面奏請曰堯  
舜雖有至德有禪授之事然親覽庶政並經百年陛下以至聖之

德撫有四海殆將十載臣望陛下遵堯舜之道以百姓爲心高祖  
祖曰吾思此事已熟懷之久矣故欲怡神以養生不欲矯情以從  
物惟恐性不能盡歡娛身不能恣逸樂自不能觀五色耳不能聽  
五音口不能極膏腴鼻不能分臭馥今傳受得所業泰身安此是  
怡神以養生曾吾之宿志若乃飾仁義矜智能勞神以施號令疲  
形以行賞罰此是矯情以從物非吾心之所取也夫善治外者不  
傷性善治內者不累身吾方以道攝生養性故脫屣于女豈可嬰  
吾以負重哉太宗稽首固請高祖曰夫爲人子務自致其親于安  
樂吾老矣傳女以萬幾若不從是非孝也太宗弗敢辭于是遣太  
太尉司空魏國公裴寂賜策曰夫天生蒸民樹以司牧三靈輔德  
百姓與能粵自夏殷傳業裔祚軌物長世率由茲道朕祗膺靈命

肇開寶曆聲教所覃無思不服然而萬機填委九區輻輳明發不  
寐考極觀書聽政勞神經謀竭慮深思閒曠釋茲重負咨爾聰明  
神武實天生德君人之量爰備夙成王業初基雲雷伊始英謀獨  
斷秘策潛展及拓定關隴澄清河洛北通玄塞東靜青丘宏圖遐  
舉元功克茂氛霧廓清鯨鯢盡殄澤霑分外聲暢無垠總通機衡  
百工以乂敷弘德化四門允穆謳歌所屬宇內宅心象緯告徵靈  
明斯在朕是用上稽蒼昊俯順黔黎推而弗居永垂顯號致皇帝  
位于爾躬今命司空上柱國魏國公寂尚書左僕射上柱國宋國  
公瑀齎璽綬爾其纘承洪緒對揚休命式隆寶祚以康四海太宗  
固讓詔不許之甲子太子卽位于東宮顯德殿兼遣太尉司空裴  
寂柴燎告天于南郊曰皇帝臣某敢以玄牡昭告皇天后帝太上

皇厭居正極疑情姑射倦此萬幾釋茲重負人臣不可以無主天  
敘胡可以無敦曆數有歸假當寡薄神器有奉用集太平懼忝帝  
位固辭弗克遂膺大禮臨馭兆民敬簡元日告類上帝卽皇帝位  
惟神敷佑萬邦永綏天極

劉氏曰綱目書傳位明有受也此則曷爲不書傳譏也若曰帝  
則自稱太上皇而太子卽位云爾授受之際其亦未有以暴白  
於天下矣是故太宗之立書太子卽位而不書傳肅宗之立書  
太子卽位而不書傳皆有憾之辭也

冬十月詔追封故太子爲息隱王齊王爲海陵刺王改葬之

後追復  
息隱王

爲隱太子海陵  
刺王號巢刺王

太宗皇帝貞觀

元年

春正月燕郡王李藝反涇州統軍楊岌討殺之

二年

戊子

夏四月遣右衛大將軍柴紹等討梁師都其下殺之以首降

劉氏曰唐初諸僭國非叛臣未有書討者此其書討何名狄且  
迷復也故前書寇今書討

二年

巳

夏四月上皇徙居大安宮

太上皇以弘義宮有山林盛地乃徙居焉改名大安宮詔曰書云  
知人則哲惟帝難之易曰通變宜民使民不倦故太伯端委周室  
以隆東海就國漢基方永立權致位可不然乎朕世襲潛衣蒙傳  
鼎業佐魏及周勤勞王室有隋御曆地居戚里常以補天在慮納  
揆爲心大業道喪皇極如燬傾維折柱天下分離塗炭納隍黔黎  
殆盡顧茲九有鋒鏑縱橫靜念扶持計無所出世民幼懷大度性  
合天道韞經緯之奇文包湯武之遠略深謀秘策沃朕拯溺之心

壯志雄圖啓予救焚之志因其感激許以經綸合義興師投袂而起車次于平陽之阪劔及于孟津之會元戎所詣冰消霧卷曾未浹旬廓清京邑定非常之業建不世之功上古以來未之聞也朱德若拾遺至若黑闥餘兇圓朗小醜三捷七擒不可勝計一人之力冠今超古慕之遐邇豈待昌言往往以建成嫡長冀其養德日就不謂慝怨友于忌能毀善讒言屢發始至鑠金賴天啓朕心宗社降福密寤凶邪指麾殄朕媿受浸潤深念元功乃敬授帝圖先天傳政懼其溢滿驕上未稱三靈之心縱慾恣情不恤萬方之重朕故仍居紫極處之肅成察其復禮觀其齊政露往霜來四載於茲矣比聞思我王度克難克艱昧旦丕顯去奢去泰朝夕視膳蒸

蒸之性日嚴景翼翼之情日慎南越驟服北狄款關四海晏然五兵偃戢招君璋之衆只用尺書屠師都之城無虧寸刃公卿輯睦遠邇又安金鼓絕於疆場心鏡懸於億兆盡善盡美吾無間然匪天祐之孰能至此令月吉辰風調雨順俯觀人事仰鑒穹昊當養性別宮使其正位居中宜令有司具禮務在周備朕得脫屣高路擬跡於軒轅授曆傳爾妻屬於啓誦大寶旣固十年惟永付託有所何樂如之百辟卿士等或晉陽從我同披荆棘或秦邸故吏早預腹心並以德舉言揚進忠顯效保乂社稷天平地成惟當帶礪山河與國休戚可悉心輔弼無黨無偏罔或隳哉替而不績善事元首稱朕意焉帝奉表固讓曰臣聞至敬無文至誠不飾地居臣子不以小忠撓志情兼家國不以細行嬰心臣蒙獎厲擢

居天策戰必以死實深愍于黎庶奮不顧命願無忝于宗社規摹指麾皆稟勝筭人助神佑遂得成功安敢貪天自為已力前以聖人大寶濫鍾愚懦臣謂肅成理務禮通監撫日慎一日不敢推辭今奉茲詔更垂諭獎予以四海乂安褰裳紫極歸尊軒轅天下幸甚令臣卽當啓誦不覺厚顏頃者陰陽尚愆嘉穀未穗政治有虧刑具不措恐眇身多罪以及萬方伏願天慈仍安大極俾民知堯曆玉燭順序網開湯祝金科削編後降輦西宮于事未晚付臣宣室不敢當仁臣志在亡私冒丹轂上上皇手詔曰君之于臣尚須探察父之審子豈可同常汝夙懷忠孝吾愛汝過于諸子况立功德具如前詔所恨吾受讒言幾至投杼上天降福神氣安寧此乃宗廟有靈非獨吾之幸也比察汝德政聽汝德音洋洋盈耳副吾

昔齊有糝政而致小白晉有艱難而獲重耳今天下慶賴在汝一人頃者寒暑不調水旱垂節止是吾與汝安處未得其位所致承乾所居非少陽之體吾今往西宮思萬代之福汝何勞撓抑頗此言請但深思大道永保社稷善始令終無或懈怠奉行吾詔勿以小讓爲懷至公之言彼宮此室勢何殊也異姓之賢尚欲權之今汝已克負荷應茲當璧其尉吾意宜絕常辭也帝不敢忤意乃止乙亥太上皇居于太安宮帝親侍輿輦百僚陪從置酒高會極懽而罷甲午帝正位于太極殿

唐顧况進高祖受命造唐賦表臣况言臣聞上古滅跡以恢至道其次立名以扶大化臣山谷之人頃爲韓滉參謀滉性嫉惡臣性孤直滉先朝露臣復故山陛下拔臣臣况口噤汗出不敢論天下



事然自開元天寶已來耳目所接精經茂德略有百人不需一命  
非不欲出無益所以不出豈大國無人而黨與之徒未詳菽麥驟  
居清貴此由權臣上負明主下負蒼生中遏賢路耳是非邪正勢  
不兩立唐有天下賦歛甚薄刑罰甚寬神人保和鳥獸咸若然而  
時有反側逋逃之誅得無因乎惟天啓聖無有一物不得其所書  
曰遠人不服來以文德德猶土也廣厚載物文猶火也光明麗天  
尅金之象生土之義蓋聞朝出群龍多士如海出夜光明月所以  
別好惡而扇華夷采有影不從表聲不從聽聖德惟新頌聲不作  
臣下之闕也謹進高祖受命造唐賦一篇論皇家大慶歷祚延及  
况若光靈促臣上獻伏惟陛下赫赫巍巍與天同功鳳凰巢于阿  
閣麒麟乳于郊藪臣之願也無任水谷之悌謹奉表以聞臣况誠

惶誠恐頓首謹言

欲出下一本  
有知出二字

賦序曰隋文帝滅陳盪定海內煬昏有罪墜失先業身滅國替幼  
恭以神人非聖莫可乃命太保蕭造奉皇帝璽綬歸我高祖高祖  
固讓謠歌獄訟已歸唐矣而薛舉王充竇建德等陳勝倡禍爲漢  
作階夫鹿臺之積非無財也閭左之戍非無卒也湯以七十里文  
王以百里而臣諸侯非有土也隋地徧天下二帝之業一朝掃盡  
可不謂大悲乎吳公子札古之達天命者其歌唐思深哉其有陶  
唐氏之遺風乎氣蒸芒碭龍躍太原天命也昔司馬相如賦子虛  
諸侯之事非天子之事漢武聞之猶曰朕獨不得與此人同時班  
固張衡左太冲所賦兩京三都各務誇大而王者受命則闕而不  
書蓋賦者古詩之流古者採詩言之無罪今王澤不竭斯文未喪

翰墨間作其誰曰不然先王建國始以文經上行下効終以武定  
疆本弱枝四方翕然無凶人矣故明德慎罰文王所以造周也應  
天順人武王所以克商也書云帝堯聰明文思帝舜濬濬哲文明斷  
自唐虞洎乎周漢帝王美稱以文爲首我唐文德宜在三代之上  
微臣賦頌恥居數子之下初論隋氏顛覆次論皇家開統末論告  
厥成功簡于上帝鋪乎下土播乎無窮固非常才淺慮之所能及  
意者實以祖宗光靈引耀鼓動之所致也其辭曰在桓靈之道墮  
兮本小而末大下陵而上替君臣相失南北歷帝天醜隋而命唐  
纂周漢之鴻裔大哉文王王季其父武王其子父作子述叶天命  
以應期煬爲不道庶官攜貳魚爛土崩荒沉所致雖曰匹夫之勇  
二作雖匹夫之勇兮有盜中原之意凶貫既盈果不保於神器江都之禍醋

一甚墜夷之事亡國之君雖綿古而必類王者父天母地非所以苟  
其身而貪厥位豈有男女疾痛而父母不爲之歔歔乎此真主所  
以乘時而建義也曾不一戰而得行其志湯武應天也其實誓師  
高祖受禪也其實揖讓猶感恩以慟哭乃立代而尊煬仗順而升  
蓋前經之所曠承土德以播業兮與炎靈而更生維李其根降居  
真源洎武昭之隴胃揚太祖之周勲典則明融是將貽乎子孫高  
皇生而豁達大度御齊弱而能言神光佳氣兮爛以氛氲中疑白  
雀兮戴紫雲隱隱曛曛兮始乎太原君子得時有如追奔岷峨遵  
江兮河出崑崙雷砰一作砢電掣浩浩渾渾厥波雖雄爲海所吞乾  
健而坤順兮利配乾而法坤有何姦豪恃險偷存乃建皇極鍾乎  
歷數葦舊鼎新兮式閭封墓走百神以咸秩兮包五岳而作固過

蒲津而川后增流兮次霍邑而山靈告路彼上慘兮我寬刑以  
 薄賦陋茅屋乎土階遵朱于與大輅乃有嚴更之警環衛鈞陳文  
 昌武庫玉冊韜府兮內八景之真文金盤粲一作霞兮承九天之  
 清露元聖有作恢法慶也厥祖草昧諸夏宗臣蠻夷酋長從德如  
 歸若王固讓而天下可違乎有社稷焉不可闕祀有蒸人焉不可  
 無主是以木曰威仰火曰熯怒辰戌丑未主我唐土天寶若曰四  
 海橫波虔劉札瘥若王盤桓柰天下何義寧二年五月甲子高祖  
 卽位木官曰甲水官曰子支干相生成字為李雖子卯不舉而以  
 是為戒此臣子所以服泰階也神祇叶從龜筮攸同乃更正朔以  
 刀文為開通告于上下予昧乃德嘉乃丕績若將殞于厥躬草艾  
 渠魁兮罔駕英雄拔萬姓於湯火兮散三光於昊窮此皇王所以

職教化也非天下衍不應非聖不作造我鉅唐在夏之興躬成九  
 服經啓九道荒厥迹之茫茫在周之興西至流沙東至樂浪重九  
 譯乎越裳在漢之盛大夏身毒月支夜郎辰韓之國盡疑革傍行  
 未若我唐歌其聲舞其容十有二部鏡一作鐘立乎中央唐既有土  
 德樂亦有臣妾易曰殷薦上帝又曰行地無疆提封所經聲教所  
 被窮天下之珍怪截海外之梯航逾蟠桃而跨弱水兮蓋四十萬  
 里鳥飛驥驟兮鱗萃乎舩艍不以三代為境土七雄為富疆乎何  
 則漢高提劍學校興於文景周武載戈頌聲作於成康卜代三十  
 延祚四百亦謂之享國久長與夫青牛紺幘白馬朱纓報千祀於  
 元君兮呼萬年於太行林邑貢能言之鳥大宛奉汗血之馬孰與  
 四白鹿四白狼乎擒建德於武庫兮格魏公於教倉耕有三十年

之畜以備凶荒戰有百萬衆之師以讐戎羌胡驕則馬銜塞草寇  
 虐則龍決天潢又孰與周漢之廣建康莊在歲九天之下九地之  
 上兮合二九爲一方疑碧樹於洞房送白雲於帝鄉舞破陣於清  
 廟兮準文始與西廂迎氣於東郊兮養老於上庠禘祫之禮秬鬯  
 珪瓚兮辟雍明堂襲蛟鱸之馥馥疊鼉鼓之鏜鏜羽林孤兕青衿  
 胄子森琳瑯以鏘鏘河山巨防百二盤岡渭水貫都兮來天漢之  
 湯湯浞龍宮而梢鬼國延苑囿而峻墉隍驅一作駝駟駟犀象乘  
 簧附翼之馬骨騰肉飛滅沒陸梁驚出女床鷄雞白鷗孔翠翱翔  
翺一縮砂磧與江湘休徵四塞兮花萼連芳大容揮絃兮子晉吹  
作相簧飛廉馳道兮河鼓服箱雍門韓娥流徵叩商徹歌鐘於未央校  
 羽獵於長揚升平既久兵設不防虜自燕垂陷乎洛陽雲雷遘難

金火耀芒上帝之哀下人兮生魂魄而起膏肓

楚詞曰帝命巫陽有人在下鬼魄離

散肅宗龍飛日出鳳翔兮四誅犬羊代宗赫怒兮草被嚴霜復九

廟之郊裡三辰忽乎擘煌扶已撓之厚棟細既絕之頽綱然一胡

作亂四海犇亾父習乎勇毋抱其子乘城看戰電掃八荒天下大

定朝廷無事帝端拱于穆清呀溟渤以爲池兮拓宇宙以爲城務

子來之經營乃有棟宇之盛砥瓠礪刻桶雕楹甲乙於方中兮

勢天矯而上征東西兩京岳立雲峙宮室相望八百餘里雖千數

萬名猶未盡也翼翼峨峨重關四塞抵昆明而瞰太液象蓬壺之

廣大踐太華而節終南抱周秦之襟帶於是偃師偶人郢匠朽墁

之輩工發藻繪情生巧昧式瞻魄駭爰處體怵乃有輿服之飾鏤

載錯衡霓旌羽蓋紋彪綉戶宵玲瓏以相對明月夜光煥合影乎

其内青琴素女間木難

選詩珊瑚間木難注色珠也一木作闌恐碧誤

之飾響結綠之

腰珮嗟神人之叶和感雨露之霏霽職貢隘入貢車溢載馮夷

一作

永夷蓋馮夷別名

陽侯既降於英靈木魅山鬼不勞乎祈賽于時太府太

倉粟腐繒敗荔枝橘抽魚盐惟錯之翦隘幽明黜陟輕重約法之

殿重二百餘年天下九百餘萬戶六千三百萬口倥傯歛寡國富

家肥砢礪岌岌碾碾磳磳今沸渭駁杏訇訇噦噦今直地整天來

朝會今夫子於是乎班瑞等威卑其君長降為牧守宸衿恢張以

天地之無外一萬二千年為一紀三萬六千年為一代古者登太

山七十二君兩漢踵武亭亭雲雲八百餘年寂寥無聞我唐傳祚

已來革隋一封岱二克復三除亮四五將發三開備南正司天北

正司地勾測影於北至建相風於南事太微太一金版玉筥逮夫

灌中闕里之類蓋三十萬卷傾古今之文字振古以來未之有也

其事始於武德成於貞觀興乎

一作於乎

開元天保之間唐虞夏殷之

世不足多也然則天子四海為家六合為都方明參乘昌寓為御

三載考績五載一巡狩觀萬國之有無禹會會稽舜遊蒼梧曰侯

予后后來其蘓天子於是命有司興農圃廢土木放女謁斤讒夫

臣拜手稽首載陳厥謨康哉良哉耻其君不及唐虞

唐起義堂頌序曰堯以天下禪舜舜以天下禪禹禹將宅百揆總

萬國一讓于稷高再讓于臯陶稷高先舉彼商與周以之更盛臯

陶後天我國家於茲受命非舜以考天而疇咨審靈命之陰隲非

禹以亨天而德讓知曆數之有歸及乎玄元間出光大前慶垂道

德而統運依清虛而立法天祚我李厥惟舊哉并州起義堂者皇

天造帝之初高祖誓衆之地也隋氏失御國亂無家小道自賢大才胥忌惟宮室陂池之好惟沈酒暴虐是保上帝不歆黎人咸戚六軍禦海而東敗萬乘過江而南覆豺狼入邑獫狁爭人黔首囂然方將無訢我高祖感之乃龍耀晉水鳳翔太原百姓前驅萬姓來奔開咸陽入天門用湯武之兵靜新室之亂遵唐虞之典承太王之基率百官受終於文祖輯五玉班瑞于諸侯類圓禋方之禮備封功爵德之議允約法惟簡代虐以寡子惠困窮懷柔蠻貊金石一變日月重華近古以來未有革命易姓若此之盛者也非天私我有唐惟天祐於積德非唐求于人庶惟人懷于累仁當此之時太宗內啟聖謀外行專斷躬擐甲胄跋履山川駕英雄而爲奧主一區域而定大業周詩曰昊天有成命后受之信今之謂也若

夫修德以降命奉命以造邦源濬者流長根深者葉茂天人報應豈相遠哉觀周之興始于后稷公劉承以大王王季皆勤儉忠厚克廣前烈至于文王承之武王啓之康王安之故卜世三十卜年八百天所命也我唐之興也始于皐陶玄元承以景皇元帝皆立言邁德垂裕後昆至于高祖受之太宗有之高宗守之中宗復舊業睿宗新景命比之周室我何謝焉且如陳德明刑庶其躬稼之績玄宗道要小其避狄之仁化流率土狹其江漢之域義寧大朝羞其牧野之戰故武德中大行出大聲曰唐興理萬年蓋天之所命年代未可涯也仲尼曰惟天惟大惟堯則之又曰韶盡美以又盡善也非至德其孰能如此其大者乎於戲先后捨元子而立予至鬯頒大位而付予天下自高祖創業百有六戰欽承丕緒十有

四載東西南北無思不服山川鬼神亦莫不寧實惟藝祖儲福之所致豈予幼孫菲德之能及方將運心于玄妙之境勵志于造化之爐發令爲祥符施惠爲霖雨任賢爲兩曜伏能爲四時俾溥天之下有形者遂全懷生者自足樹鋪野繭田種嘉穀斷雕爲撲拍珠棄玉追大庭而齊風夙瘳膏而同俗非曰能爾願憑宗祐而效焉癸亥之歲獻春正月濟河橫汾省方展義存問黎老緬慕本邦城郭巍然桑梓如舊覽風物之憂思尋王業之艱難惟高祖若天地之覆載化成萬類惟太宗若日月之照臨光于四表舉晉陽之甲除君側之盜由唐侯之封升天子之號肇基發迹實在於茲仙駕無所或顧懷于舊土靈魄無方儻來歸于此堂郡縣之所宜嚴奉前人有言曰禮不忘本樂保其德如姬詠周原而劉歌沛邑思

我烈祖如聞歎息之音嗟爾後人無念成功之頌頌曰皇矣上帝臨下有赫降監四海求人之瘼吁彼隋煬其政不獲眷我高祖此惟其宅天輔臯陶刑名教道遵老氏同玄體妙仁表四乳明融獨照隨父託心史良辨貌高祖誕靈神光夜耀天妹作合日兄夢紹祚生文帝膺運會昌首唱高祖騫飛晉陽萬夫一心元戎啟行火旗炎炎雲鳥洋洋五星迓帝萬國謳唐天網恢疎王師節制威雅連戮老生摧斃山祗引軍河龍渡帝渭滄散積離宮弛閉關輔來蘓遠方咸惠長安宮室上法太微隋遷寶鼎唐在璿璣仗入雙闕詔出九圍三靈協載百祿同歸帝謂太宗表正封畧濤蕩颶掃霆馳電爍劍不摧鋒弩無再曠西平汧隴東取河洛杲密德克頭懸面縛北走獯鬻南達蠻荆遼碣作又梁岐底平風動神行海隅蒼

生莫不來庭於昭義堂哲衆資始天命所起于胥頌美維予小子  
夙夜敬止於戲皇王緒思不忘

舊唐書高祖本紀論曰有隋季年皇圖板蕩荒主輝燎原之焰群  
盜發逐鹿之機殄暴無厭橫流靡救高祖審獨夫之運去知新主  
之勃興密運雄圖未伸龍躍而屈已求可汗之援卑辭荅李密之  
書決神機而速若疾雷驅豪傑而從如偃草洎謳謠允屬揖讓受  
終刑名大剗于煩苛爵位不逾於適軸繇是攫金有恥伏莽知非  
人懷漢道之寬平不責高皇之慢罵然而優游失斷浸潤得行誅  
文靜則議法不從酌裴寂則曲恩太過姦佞由之貝錦屢幸得以  
撥蜂獻公遂間於申生小白寧懷於召忽一旦兵交愛子矢集申  
孫匈奴尋犯於便橋京邑咸憂於左衽不有聖子王業殆哉

贊曰高皇創圖勢若摧枯國運神武家難聖謨言生牀第禍切  
肌膚鳴鴉之詠無損於吾

新唐書高祖本紀贊曰自古受命之君非有德不王自夏后氏以  
來始傳以世而有賢有不肖故其爲世數亦或短或長論者乃謂  
周自后稷至於文武積功累仁其來也遠故其爲世尤長然考於  
世本夏商周皆出於黃帝夏自鯀以前商自契至於成湯其間寂  
寥無聞與周之與異矣而漢亦起於亭長叛亡之徒及其興也有  
天下皆數百年而後已由是言之天命豈易知哉然考其終始治  
亂顧其功德有厚薄與其制度紀綱所以維持者如何而其後世  
或寢以隆昌或遽以壞亂或漸以陵遲或能振而復起或遂至於  
不可支持雖各因其勢然有德則興無德則絕豈非所謂天命者



常不顯其符而俾有國者兢兢以自勉耶唐在周隋之際世雖貴  
矣然烏有所謂積功累仁之漸而高祖之興亦何異  
或絕或微然其有平天下年幾三百可謂盛哉豈非人厭隋亂而  
家德澤繼以太宗之治制度紀綱之法後世有以憑籍扶持而能  
永其天命歟

舊唐書太宗本紀論曰臣觀文皇帝發迹多奇聰明神武拔人物  
則不私於黨負志業則咸盡其才所以屈突尉遲由仇敵而願傾  
心齊馬周劉洎自疎遠而卒委鈞衡終平泰階諒由斯道當神堯  
任讒之年建成忌功之日苟除畏逼孰顧分崩變故之興間不容  
髮方懼毀巢之禍寧虞尺布之謠迹其聽斷不惑從善如流千載  
可稱一人而已

贊曰昌發啓國一門三聖文定高位友于不令管蔡旣誅成康  
道王貞觀之風到今歌詠

新唐書贊曰盛哉太宗之烈也其除隋之亂比迹湯武致治之美  
庶幾成康自古功德蓋隆由漢以來未之有也

學海若道部卷之一百三十七 終

卷之十四

三十九



